



西湖遊覽志第六卷

錢唐田汝成輯撰

南山勝跡

自清波門折而南爲筆架山方家峪忠節祠褒親崇壽教寺

忠節祠以祀宋太學生徐應鑣者應鑣衢州人宋亡義不降虜與其二子琦崧女元娘俱赴井死同舍劉生等收其屍葬於此朝命贈爲秘閣脩撰正德間叅政梁材奏請立祠有司春秋致祭褒親崇壽教寺俗稱劉娘子寺宋紹興十八年劉

貴妃建貴妃臨安人入宮爲紅霞帔得幸累遷
才人婕妤婉容尋進貴妃專掌御前文字工書
畫畫上用奉華堂印然恃寵驕侈常盛夏以水
晶飾脚踏高宗見之取以爲枕妃懼自此少戢
父懋因金人南侵獻錢二萬緡以助軍費高宗
嘉之遂令建寺以爲功德有泉自鳳凰山而下
注爲方池命爲鳳凰泉于湖張孝祥書刻內有
松雪亭觀音洞筆架池偃松交枝檜壁間舊有
陳公儲畫龍甚奇弁陽翁詩翟羽鸞綃事已空
奉華遺寺對高松宮斜鳳去無人見且看門前

粉壁龍○秦少游詩匹馬驕嘶石路斜觀音洞
口踏烟霞普陀風景差相似只欠潮音小白花
○周端臣詩萬竹蒼寒擁寺門寺碑金字御書
存榮華肯信當年事儀制空留后世恩影閣有
聲塵網暗殞宮無月土花昏見梅不敢輕攀折
恐是春風水際魂

方家峪畔舊有永隆寺遇真院悟真院崇真院廣
慈院廣嚴院廣福院淨教院寶藏院西蓮瑞相
院西林泐惠院安福禪院並廢○永隆寺僧淨
林建○廣福院陳淑妃香火又名報恩○淨教

院蔡貴妃香火。○寶藏院有烏龍井錢武肅王
廟碑。○西蓮瑞相院黃貴妃香火。○西林法惠
院宋乾德三年建慶曆間禪師法言作西軒激
水爲池。疊石爲山。灑粉峰巒草木之上。以象飛
雪。蘇子瞻見而愛之。題曰雪齋。秦少游爲之記。
子瞻詩君不見蛾眉山西雪千里。北望都城如
井底。春風百日吹不消。五只行人如凍蟻。紛紛
市人爭奪中。誰信言公似贊公。人間熱惱無處
洗。故向西齋作雪峰。我夢扁舟適吳越。長廊靜
院澄如月。開門不見人。與牛惟見空庭滿。山雪

○安福禪院內侍陳都知香火

又西南爲華津洞梯雲嶺

華津洞宋時趙冀王園中層疊巧石爲之者。曲引
流泉灌之。水石奇勝。花竹蕃鮮。有仙人棋臺在
焉。

梯雲嶺石磴峻絕。嶺下舊有水月寺。宋太平興國
二年建。元末燬。有水月池。靈固石。蘇子瞻詩千
尺長松掛薜蘿。梯雲嶺上一聲歌。湖山深秀在
何處。水月池中桂影多。

折而南爲慈雲嶺永壽禪寺

慈雲嶺者龍山支脉也故其山名寺額多以龍名
石壁間篆刻梁單闕之歲興建龍山至湑灘之
歲開慈雲嶺一十八字嶺之巔有亭曰江湖偉
觀嶺下有觀音洞洞口有下石龍庵今廢
永壽寺舊名資仁後改上石龍永壽院吳越王建
石壁上刻宋仁宗佛牙讚讚辭鄙陋蓋僞爲者
嶺下舊有惠光尼寺地藏尼寺福全尼院淨勝院
並廢○惠光尼寺乾道間張循王女孫真寂自
幼爲尼奉韋太后香火相繼住持皆張氏女也
有佛指放光故名○淨勝院舊名下石龍

之南爲龍山

龍山一名臥龍山又名龍華山與上下石龍相
去城南可十里許天目分支沿江而東結局於
此蜿蜒若遊龍然山北有鴻鴈池其東爲白塔
嶺

其上爲天真禪寺登雲臺其下爲天真書院天龍禪
寺天華禪寺勝相禪寺龍華禪寺宋籍田

天真禪寺梁龍德中錢王建寺居山頂今惟一庵
存焉

登雲臺後梁龍德中錢王建又名拜郊臺蓋錢王

西泠志卷之六
借郊天地之所也。臺側有靈化洞。武肅王勒壁存焉。洞深百步。闊十餘丈。和靖東坡題名。

天真書院。本天真天龍淨明三寺地。嘉靖九年僉事王臣揭陽薛侏會稽王畿錢德洪改建書院。以祀新建伯王公伯安。中爲祠堂。後爲文明閣。藏書室。望海亭。左爲嘉會堂。游藝所。傳經樓。右爲明德堂。日新館。傍爲翼室。置膳田。以待四方遊學者。○王伯安西安雨中寄德洪汝中并示書院諸生詩。幾度西安道。江聲暮雨時。機關鷗鳥破。踪蹟水雲疑。伏鉞非吾事。傳經愧爾師。天

真泉石秀。新有鹿門期。○又寄答德洪汝中。方卜書院。盛稱天真之奇。詩不踏天真路。依稀二十年。石門深竹。逕蒼峽。瀉雲泉。泮壁環胥海。龜疇見宋田。文明原有象。卜築豈無緣。○湛元明詩。迢迢訪天真。歷歷登茲堂。灑落南高峰。睥睨臨錢唐。地位高且深。如道不可量。哲人久已逝。山水空遺光。龜疇列左方。顯設天文章。平生未一試。千載慨相望。我來增感嘆。久要不可忘。陳辭之不足。繼之以心香。

天龍寺。宋乾德三年吳越二建。以居鏡清禪師大

中祥符元年改名感業建炎三年大火惟木觀
音像獨存紹興十三年建園丘以淨明院爲齋
宮以感業居從官從此僧徒漸散而寺亦圯元
延祐間僧道平重建至正間南北兩山諸刹或
燬或頽惟天龍僅存寺有堂扁曰山舟貫雲石
所書寺中有凝翠井余士吉詩龍飛鳳舞兩峰
回王氣纔銷梵宇開卓錫地侵行輦地雨花臺
近拜郊臺草分野色綠城去風引江聲入寺來
三百年過如昨日老禪猶說舊蓬萊○張輿詩
鳳凰山中多古寺天龍之境何深幽半空花雨

春浮殿萬壑松聲風滿樓宋室園丘禾黍合
鬢方丈石泉流吟哦不盡登臨興落日滄江生
客愁○劉士亨山舟詩高僧任處屋如舟臥穩
渾無夜壑憂篙櫂不施隨地泊波濤已斷樂天
游香飄半入蒼龍窟夢落多迷白鷺洲喚起酸
齋狂學士虎溪溪上共夷猶

天華寺舊名千春龍冊爲鏡清禪師道場有願軒
妙音樓化生池

勝相寺舊名龍興千佛唐開成中建錢氏時有西
竺僧轉智者附海船歸風鳴浪湧智誦如意輪

呪見如意珠王相高十丈風息得濟智謀建高
宇以答佛施建炎兵燬止存五丈觀音諺傳人
有意度則云轉智者以此也乾道中孝宗常臨
幸焉

龍華寺舊名龍華寶勝錢王以瑞萼園捨建有傳
大士塔像拍板門槌司馬温公祠堂今皆不存
傳大士故漁人也遇嵩頭陀語曰我昔與汝於
毗婆尸佛前發願度生汝今何時還兜率宮指
令臨水觀影大士乃見圓光寶蓋便悟前因夫
婦雙脩頓通佛法梁武帝召見壽光殿共論真

諦大士曰息而不滅帝又請講金剛經大士拍
案一拍而起帝不喻再請講大士乃索拍板升
座唱四十九頌頌終而去蘇子瞻大士像贊云
善慧執板南泉作無借我門槌為君打鼓元末
燬國朝宣德四年建殿出寺外舉
宋籍田在天龍寺下中規圓環以溝塍作八卦
狀俗稱九宮八卦田至今不紊

山傍有宋郊壇高林壇淨院大通院道林院
惠院般若院中興王觀烏菱池鴻雁池
津園並廢○郊壇初興二年建王元章詩

南郊路金甌。不復行古臺。餘草色新樹。自風聲。寂寞荒竹。一。婁京故國情。遺民能道舊。曾是御營兵。汪以質經故。郊臺詩云。厭煩尋路僻。偶爾入荒村。古禮存遺蹟。圓丘儼至尊。松風悲闐寂。宋江月照葦。餘恨無今古。行人欲斷魂。○高禩壇。紹興四年建。內有鴻鴈池。張仲舉詩。衰草寒烟老。木風南朝佳氣落。然空壁來山鬼。遮秦使。繫泣僊人出。漢宮壞。埒尚傳祠乙鳥。荒池曾見射飛鴻。騷人自古多荆思。長在登臨感慨中。○淨明院郊壇齋宮。有易安齋。梅花岩。江月庵。節

寫亭。高宗梅花岩詩。怪石蒼岩映翠霞。梅梢疎瘦正橫斜。得因祀事來尋勝。試探東風第一花。○寶惠院。一名普濟。吳越王建。○般若院。吳越王建。○烏菱池。一名窰池。○玉津園。在嘉會門外。紹興十七年。建孝宗數臨幸。命郡臣燕射于此。自後翠華罕駐。景物漸衰。陸務觀詩云。聖主憂民罷露臺。春風別苑晝長開。盡除曼衍魚龍戲。不禁芻蕘雉兔來。水鳥避人橫翠靄。宮花經雨委蒼苔。殘年自喜身強健。又作清都夢一回。稍南為妙因山。吳越國文穆王忠獻王墓。

蘇文穆王名元瓊武肅王子忠獻王名仁佐文穆王
子舊有表忠觀蘇子瞻爲之記云熙寧十年十
月戊子資政殿大學士右諫議大夫知杭州軍
州事臣抃言故吳越國王錢氏墳廟及其父祖
妃夫人子孫之墳在錢唐者二十有六在臨安
者十有一皆蕪廢不治父老過之有流涕者謹
按故武肅王鏐始以鄉兵破走黃巢名聞江淮
復以八都兵討劉漢宏并越州以奉董昌而自
居於杭及昌以越叛則誅昌而并越盡有浙東
西之地傳其子文穆王元瓊至其孫忠獻王仁

佐遂破李景兵取福州而仁佐之弟忠懿王俶
又大出兵攻景以迎周世宗之師其後卒以國
入覲三世四王與五代相終始天下大亂豪傑
蜂起方是時以數州之地盜名字者不可勝數
旣覆其族延及于無辜之民罔有孑遺而吳越
地方千里帶甲十萬鑄山煮海象犀珠玉之富
甲於天下然終不失臣節貢獻相望於道是以
其民至於老死不識兵革四時嬉遊歌鼓之聲
相聞至於今不廢其有德於斯民甚厚皇宋受
命四方僭亂以次削平而蜀江南負其險遠兵

西漢志卷之六
至城下力屈勢窮然後束手而河東劉氏百戰
守死以抗王師積骸爲城釃血爲池竭天下之
力僅乃克之獨吳越不待告命封府庫籍郡縣
請吏於朝視去其國如去傳舍其有功於朝廷
甚大昔竇融以河西歸漢光武詔右扶風脩理
其父子墳塋祠以太牢今錢氏功德殆過於融
而未及百年墳廟不治行道傷嗟甚非所以勸
獎忠臣慰答民心之義也臣願以龍山廢佛祠
曰妙因院者爲觀使錢氏之孫爲道士曰自然
者居之凡墳廟之在錢唐者以付自然其在臨

安者以付其縣之淨土寺僧曰道微歲各度其
徒一人使世掌之籍其地之所入以時脩其祠
宇封殖其草木有不治者縣令丞察之甚者易
其人庶幾永終不墮以稱朝廷待錢氏之意臣
抃昧死以聞制曰可其妙因院改賜名曰表忠
觀銘曰天目之山若水出焉龍飛鳳舞萃于臨
安篤生異人絕類離群奮挺大呼從者如雲仰
天誓江月星晦蒙強弩射潮江海爲東殺宏誅
昌奄有吳越金券玉冊虎符龍節大城其居包
落山川左江右湖控引島蠻歲時歸休以燕父

老瞍如神人王帶毬馬四十一年寅畏小心篋
篋相望大貝南金五朝昏亂罔堪託國三玉相
承以待有德既獲所歸弗謀弗咨先王之志我
維行之天祚忠孝世有爵邑允文允武子孫千
億帝謂守臣治其祠墳毋俾樵牧愧其後昆龍
山之陽歸焉新宮匪私於錢唯以勸忠非忠無
君非孝無親凡百有位視此刻文

稍比爲玉厨山善慧禪寺
善慧寺元延祐間建伏龍岡禪師道場寺傍舊有
真覺院

妙因山之陽爲江文昭公墓

江氏仁和世族其父珙舉景泰辛未進士歷官給
事中山東右叅政文昭公名瀾舉成化戊戌進
士歷官翰林院編脩學士吏部左侍郎忤幸臣
劉瑾出爲南京禮部尚書其弟洵戊午舉人瀾
之仲子曉舉正德戊辰進士歷官吏部郎中布
政使府尹工部有侍郎三子暉舉正德丁丑進
士歷官翰林院編修撰四子暉以恩蔭歷官
中書舍人禮部員外郎曉子坵今嘉靖丙午舉
人仕宦蟬聯甲於一郡世德清謹而叅政尚書

西湖志卷之六
修撰皆從祀府學鄉賢祠侍郎修撰圻皆以春秋魁榜尤士族所稀也

湖遊覽志第六卷終

西湖遊覽志第七卷

南山勝蹟

錢唐田汝成輯撰

自清波門折而東南爲鳳凰山

鳳凰山兩翅軒翥左薄湖濇右掠江濱形若飛鳳一郡王氣皆籍此山自唐以來肇造州治蓋鳳凰之右翅也錢氏因之遞加拓飾逮于南宋建都而茲山東麓環入禁苑張閣華麗秀比蓬岷佳氣扶輿萃于一脉開署布政駐輦宅中民吏之所憑依帝王之所臨蒞隱隱賑賑者六七百

年可謂盛矣。元時納胡僧之說，即故宮建五寺，築鎮南塔以壓之。而茲山到今落窳，乃即開元宮建省治，面對吳山，蓋鳳凰之左翅也。我朝因之，而官司位署皆列左方，爲東南雄會，豈非王氣移易發洩有時也。山據江湖之勝，立而環眺，則凌虛鷺遠，環界絕特之觀，舉歸眉睫。其麓爲萬松嶺，萬松書院，八蟠嶺，留月臺，玉壺臺。

萬松嶺夾道多巨松，在唐時已有之。白樂天湖上夜歸詩：半醉閒行湖岫東，馬鞭敲鞞響玲瓏。萬株松樹青山上，十里沙堤明月中。樓角漸移當

路影，潮頭欲過滿江風。歸來未放笙歌散，畫戟重開蠟炬紅。南宋時密邇大內，碧瓦紅簷鱗次櫛比，今夷爲大塗，而松亦無幾矣。

萬松書院本報恩寺故址也。弘治十年，參政周木燬寺而建書院，中設先師孔子及四配像，爲大成殿，明道堂，居仁由義二齋，顏樂曾唯二亭，南北楔綽，二日德侔天地，道貫古今。以孔氏子孫世守之。嘉靖五年，御史潘倣建毓秀閣，翼以精舍，以待四方遊學之士。八蟠嶺在萬松嶺右，過北而南，可達月岩。王元章

八詩路遶危垣上風高松檜鳴花飛殊失意草長
不知名遊客諮遺俗居民指舊京浮屠天末起
瞻望忽傷情

留月王壺二臺在書院右方上爲月岩下爲圭石
中有四亭曰振衣曰可汲曰依雲曰見湖秀石
巉巖青蒼玉削纍纍然若芙蓉之未舒隱見草
莽者不可勝紀

嶺畔舊有報恩寺唐元貞間建元至正間築城移
建大井巷 國初併海會寺成化間仍徙故
址內有舞鳳軒萬菊軒浣雲池銅井白樂天浣

雲池詩白雲本無心舒卷長自潔影落一鑑空
可浣不可涅鳶飛魚躍間上下俱澄澈此意難
與言覽之自怡悅○蘇子瞻萬菊軒詩一軒專
爲黃花設富擬人間萬石君佳本盡從方外得
異香多在月中聞引泉北澗分清露開徑南山
破白雲此意欲爲知者道陶翁猶自未離群○
嶺上有沈婆井嶺下有郭公井相傳晉時郭璞
所相鑿者蓋其時杭州皆濱江斥鹵艱於甘泉
故地脉非璞不可識鐵冶嶺亦有郭璞井
又東經鳳山門折而南過萬松坊爲報國講寺

萬松坊末樂已亥金臺王玘畫

報國寺元至元十三年從胡僧楊璉真伽請即宋
故內建五寺曰報國曰興元曰般若曰僊林曰
尊勝報國寺即垂拱殿殿角有銀杏樹其實無
心楊仲弘詩所謂萬年珠樹落秋霜是也內有
碧梧軒舞鳳軒興元寺即芙蓉殿般若寺即和
寧門僊林寺即延和殿尊勝寺即福寧殿下有
曲水流觴楊璉真伽發宋諸陵建塔其上其形
如壺俗稱一瓶塔高二百丈內藏佛經數十萬
卷佛菩薩像萬軀聖飾如雪故又名白塔至順

辛未正月十四日黎明雷震之至正末爲張作
誠所毀其寺鐘即故內禁物也西有墜江亭大
江百里盱眙可覽至今有尊勝巷四寺雖隘而
景致宏麗延祐至正間諸寺遞燬 皇明洪

武二十四年重建報國寺僧噩夢堂舞鳳軒詩
江濤曉上青崔嵬山勢遠從天目來錢氏豈能
當王氣郭牛端復是僊木光搖晴旭九苞動影
拂秋旻雙翅回爲我翩然覽輝下一軒着此亦
宜哉○楊仲弘錢唐懷古詩西湖清濁自天開
鴻鴈鳧鷖日往來黃道星辰環太乙紫微宮殿

西清志卷之七
四
擁蓬來能文競奏王褒頌獻壽深傾阿母杯九
域輿圖今混一百年耆舊獨興哀其二山回禁
禦入雲長無復陳兵衛兩廂千古金鐘埋野草
萬年珠樹落秋霜龍文不徙陽人聚烏篆終歸
軹道傍九市塵埃來袞袞一江風浪去茫茫其
三斜界鈎陳通大道中分魏闕對層巒雲生殿
上金爐暗露下庭前玉井寒江漢飛龍俄杳杳
滄溟泛鷁竟漫漫中天會合寧非數坐見蒼生
奠枕安其四化城宮闕被層阿棟宇高低若湧
波翠石文章題日月寶珠光燄燭山河空桑說

法黃龍聽貝葉繙經白馬駝誰道一無超衆友
祇今塵土重來過○僧宗泐詩欲識錢唐王氣
徂紫宸宮殿入青蕪朔方鐵騎飛天塹師相樓
船宿裏湖白鴈不知南國破青山還傍海門孤
百年又見城池改多少英雄屈壯圖又云天地
無情日月徂鳳凰山下久榛蕪獨憐內殿成荒
寺空見前山映後湖塞北有誰遺一老海南無
處問諸孤蓬萊閣上秋風起先向燕京入畫圖
○錢思復同武仲仁登白塔詩鹿苑蕭條景龍
山慘淡陰百年何感慨九日此登臨官葉詩誰

寫籬花酒共斟。不知城外雨涼思。蒲幽襟。其二
香火今朝幸。雲山前代宮。雕欄陳蹟在。白塔溟
烟籠。雨泣交龍柱。風悲孤鳳桐。惟應江上水。千
古酌英雄。其三。宋宮傳是唐朝寺。白塔崔嵬寢
殿前。夏雨染成千樹綠。暮嵐散作一江烟。蒼苔
門外銅鋪暗。細柳營中畫角傳。寂寞葫蘆宮井
畔。野人拾得舊金鈿。○鄭洪詩。江山襟帶尚依
然。王氣銷沉已百年。八葉龍孫東入海。六宮綵
女北歸燕。銅駝荆棘西風裏。石馬莓苔落照邊。
玉匣遊魂飛劫火。五陵嘉樹不啼鶻。

宋行宮即錢王舊宮也。皇城九里入和寧門左進
奏院。玉堂右中殿。外庫。至北宮門。循廊左序。巨
璫幕次。列如魚貫。祥曦殿。朶殿。接修廊。爲後殿。
對以御酒庫。御藥院。慈元殿。外庫。內侍省。內東
門。司大內都巡檢司。御厨。天章等閣。廊回路轉。
衆班排列。又轉內藏庫。對軍器庫。又轉便門。垂
拱殿。五間。十二架。長六丈。廣八丈。四尺。簷屋三
門。長廣各丈五。朶殿四兩廊。各二十間。殿門三
間。內龍墀。折檻殿。後擁舍七間。爲延和殿。右便
門。通後殿。殿左一殿。隨時易名。明堂郊祀。曰端

誠策士唱名曰集英宴對奉使曰崇德武舉及
軍班授官曰講武東宮在麗正門內南宮門外
本宮會議所之側入門垂楊夾道間以芙蓉環
朱闌二里至外宮門節堂後爲財帛生料二庫
環以官屬直舍轉外窰子入內宮門廊右爲贊
導春坊直舍左講堂七楹扁新益外爲講官直
舍正殿向明左聖堂右祠堂後凝華殿瞻策堂
環以竹左寢室右齋安位內人直舍百二十楹
左彝齋太子賜號也接繡香堂便門通繹巳堂
重簷複屋昔楊太后垂簾於此曰慈明殿前射

圃竟百步環修廊右博雅樓十二門左轉數十
步雕闌花瓷萬卉中出鞦韆對陽春亭清齋亭
前芙蓉後木樨王質亭梅繞之由繹巳堂過錦
腰廊百八十楹直通御前廊外卽後苑梅花千
樹曰梅岡亭曰水花亭枕小西湖曰水月境界
曰澄碧牡丹曰伊洛傳芳芍藥曰冠芳山茶曰
鶴丹桂曰天闕清香堂曰本文百世佑聖祠曰
慶和泗州曰慈濟鍾呂曰得真橋曰洞庭佳味
茅亭曰昭儉木香曰架雪竹曰賞靜松亭曰天
陵偃蓋以日本國松木爲翠寒堂不施丹雘白

如象齒環以古松碧琳堂近之一山崔嵬作觀
堂爲上焚香祝天之所理宗時吳知古掌焚修
每三茅觀鐘鳴觀堂之鐘應之則駕輿山背芙
蓉閣風帆沙鳥咸出屨鳥下山下一溪紫帶通
小西湖亭曰清漣怪石夾列獻瑰逞秀三山五
湖洞穴深杳豁然平朗翬飛翼拱凌虛樓對瑞
慶殿損齋緝熙崇政殿之東爲欽先孝思復古
紫宸等殿木圍卽福寧殿射殿曰選德坤寧殿
貴妃昭儀婕妤等位宮人直舍蠟聚焉東過閣
子庫睿思殿儀鸞修內八作翰林諸司是謂東

華門○元黃潛鳳凰山故宋宮詩滄海桑田事
渺茫行逢遺老色荒涼爲言故國游麋鹿謾指
空山號鳳凰春盡綠莎迷輦道雨多蒼薺上宮
墻遙知汴水東流畔更有平蕪與夕陽○趙子
昂詩東南都會帝王州三月鶯花非舊遊故國
金人泣辭漢當年王馬去朝周湖山靡靡今猶
在江水悠悠只自流千古興亡盡如此春風麥
秀使人愁○揚子承詩天下車書正一家數逢
陽九亂如麻兩朝北狩過天寶四海南奔類永
嘉陵寢可憐分異域衣冠不復返中華玉簫吹

暖錢唐月誰念黃龍慘暮笳○仇仁近詩漸無
南渡舊衣冠尚有西湖風雨寒鳳鳥不來山寂
寂鴟夷何在海漫漫荒陵樵采官猶禁故苑烟
花客自看惟恨餘杭門外柳長年不了送征鞍
○楊廉夫詩天山乳鳳飛來小南渡君臣又六
朝劫火不燒楊璉塔箭鋒猶抵伍胥潮燐光夜
附山精出龍氣秋隨海霧消惟有宮人斜畔月
夜深猶自照吹簫○張仲舉詩南渡君臣建業
偏不堪喬木黯風烟豈知白馬興王日又到紅
羊換劫年三輔皇圖空郡國六朝王氣渺山川

白頭開府歸來日應覽遺蹤一愴然○錢思復
詩登臨休賦黍離章千里江流接大荒劍鎖血
華空楚舞鏡埋香骨失秦粧薜蘿山鬼啼螢苑
荆棘銅駝臥鹿塲寂寞萬年枝上月夜深猶照
舊宮墻○陳廷言詩越水吳山共寂寥已無遺
老話前朝海門三日潮聲歇天目千年王氣消
夜月烏啼龍井樹春風花落海鮮橋威儀文物
今何在回首浮屠倚碧霄○王逢詩王氣凌虛
散曉霞虎闌麟閣靜烟花中天日月迂黃道滄
海風雲冷翠華望帝神遊夔子國烏衣夢隔野

人家當時舉目山河異豈但紅顏泣塞笳其二
周南風俗漢衣冠五色雲中憶駐鑿瓊瑤檜高
藏白獸葢珠花發降文鸞河通織女機絲濕雨
歇巫娥翠黛寒滿地吳山誰洒淚一江春水獨
凭欄其三瑤池青鳥集觚稜白塔金鳧閱夜燈
雲母帳虛星彩動水晶宮冷露華凝驪山草暗
墟周業郿塢花繁失漢陵白馬素車江海上依
然潮汐撼西興其四金爵觚稜月向低泠泠清
磬萬松西五門曙色開龍尾十日春寒健馬蹄
紅霧不收花氣合綠波初漲柳條齊遺民暗憶

名都會尚繞湖濬唱大堤○藍澗詩南渡山川
王氣銷西風松柏認前朝紫宸無復千官宴滄
海空餘半夜潮龍去蓬萊曾駐輦鳳歸寥廓不
聞簫上方樓閣依稀在暮雨踈鐘送寂寥○徐
賁詩荒山欲逐鳳凰騫誰構浮屠壓寢園土厚
尚封南渡骨月明不照北歸魂海門有路雙龍
去沙渚無潮萬馬屯莫向秋風重惆悵梵王宮
裏易黃昏○劉伯溫詩澤國繁華地前朝舊此
都青山彌百粵白水入三吳艮嶽銷王氣坤靈
肇帝圖兩宮千里恨九子一身孤設險憑天塹

西泠志卷之七
偷安負海隅。雲霞行殿起。荆棘寢園蕪。幣帛敦
和議。弓刀抑武夫。但聞當宁奏。不見立庭呼。鬼
蜮昭華袞。忠良賜屬鏞。何勞問社稷。且自作歡
娛。秔稻來吳會。魚龜出具區。至尊巍北闕。多士
樂西湖。鷁首馳文舫。龍鱗舞繡襦。暖沙搖襞積。
涼月浸攴輸。紫桂秋風老。紅蓮曉露濡。巨螯擎
擁劍。香飯漉雕胡。蝸角乾坤大。鰲頭氣勢殊。秦
庭迷指鹿。周室歎瞻烏。白馬違京輦。銅駝擲路
衢。含容天地廣。養育羽毛俱。橘柚馳包貢。塗泥
賦上腴。斷犀埋越棘。照乘走隋珠。吊古江山在。

懷今歲月逾。鯨鯢空渤澥。歌詠已唐虞。鷁革愁
何極。羊裘釣不迂。征鴻暮南去。回首憶尊鱸。
又南折而西爲梵天講寺

梵天寺宋乾德中吳越王建名南塔治平中改今
額元元統中燬 皇明永樂十五年重建有

石塔二靈鰻井金井先是四明阿育王山有靈
鰻井吳越王迎阿育舍利歸梵天寺奉之鑿井
南廊鰻忽見僧贊寧有記僧志銓詩落日寒蟬
鳴獨歸林下寺柴扉夜未掩片月隨行履惟聞
犬吠聲又入青蘿去○蘇子瞻和詩但聞烟外

鐘不見烟中寺。幽人行未已。草露濕芒屨。惟應
山頭月。夜夜照來去。○又寒食遊南塔寺寂照
堂詩城南鐘鼓闐清新。端爲投荒洗瘴塵。總是
鑑空堂上客。誰爲寂照鏡中人。紅芳歸去風驚
曉。綠葉成陰雨洗春。記取明年作寒食。杏花曾
與此翁隣。

唐宋以來州治故在鳳凰山下南渡駐輦因以爲
行宮而萬松八蟠介亭諸勝皆列皇城之外行
宮比州治稍東南至江干皆禁籞也故序州治
於此舊有虛白堂因岩亭忘筌亭碧波亭高齋

東樓望海樓清暉樓中和堂有美堂石林軒並
廢○白樂天虛白堂詩平旦起視事亭午臥掩
關除親簿領外多在琴書前况有虛白堂坐見
海門山潮來一憑檻賓至一開筵終朝對雲水
有時聽管絃持此聊過日非忙亦非閒山林太
寂寞朝闕空喧煩惟茲郡齋內囂靜得中間○
樂天因岩亭詩箕穎人窮獨蓬壺路阻難何如
兼吏隱復得事躋攀岩樹羅壻下江雲貯棟間
似移天目石疑入武丘山清景徒堪賞皇恩肯
放還遙知興未足即被詔催還○樂天忘筌亭

詩翠巘公門對。朱軒野徑連。只開新戶牖。不改舊風烟。空室閒生白。高情淡入玄。酒容同坐勸。詩借屬城傳。自咲滄江畔。遙思絳帳前。庭臺隨事有。爭敢比忘筌。○嚴維九日高齋詩。詩家九日憐芳菊。遲客高齋對浙江。漢浦浪花搖素壁。西陵樹色入秋牕。木奴向熟懸金實。桑落新開瀉玉缸。四子醉時曾講德。咲論黃霸屈爲邦。○樂天東樓詩。東樓勝事我偏知。氣象多隨昏日移。湖捲衣裳白。重疊山張屏障綠。參差海僊樓塔。晴方出。江女笙簫夜始吹。春雨星攢尋蠓火。

秋風霞颭弄潮旗。太守經年嘲不盡。郡齋空作百篇詩。又寄題郡樓詩。官歷二十政。宦遊三十秋。江山與風月。最憶是杭州。北郭沙堤尾。西湖石岬頭。絲觴春送客。紅燭夜回舟。不敢言遺愛。空知念舊遊。憑君吟此句。題向望瀾樓。又東樓晚眺寄張水部詩。澹烟疎雨間斜陽。江色鮮明海氣涼。樹散雲收破樓閣。虹殘水照斷橋梁。風翻白浪花千片。鴈點青天字一行。好著丹青圖寫取。題詩寄與水曹郎。又東樓南望詩。不厭東南望。江樓對海門。風濤生有信。天水合無痕。鷓

帶風帆動鷗和雪浪翻魚鹽聚爲市烟火起成
村日脚金波碎峰頭鈿點繁送秋千里鴈報暝
一聲猿已豁煩襟悶仍開病眼昏郡中登眺處
無勝此東軒又江樓夕望招客詩海天東望夕
茫茫山勢川形濶復長燈火萬家城四畔星河
一道水中央風吹古木晴天雨月照平沙夏夜
霜能就江樓消暑氣比君茅舍校清涼○蘇子
瞻望海樓詩海上濤頭一線來樓前指顧雪成
堆從今潮上君須上更看銀山十二回青山斷
處塔層層隔岼人家喚欲應江上秋風晚來急

爲傳鐘鼓到西興樓下誰家燒夜香王笙哀怨
弄清涼臨風有客吟秋扇拜月無人見晚粧沙
河燈火照山紅歌鼓喧喧語咲中爲問少年心
在否角巾欹側鬢如蓬○樂天清暉樓寄嚴維
詩嚴維制茲樓立名曰清暉未及題花榜遽催
還粉闥去來三四年塵土登者稀今年新大守
掃灑施簾幃院柳烟婀娜簷花雪霏微看山倚
西瓦待月闌東扉碧牕曼瑤瑟朱欄飄舞衣燒
香捲簾坐風燕一雙飛君作不得住我來幸因
依始知天地間靈境有所歸○中和堂本錢王

閱禮堂也。壯麗絕倫。暑月最快。蘇子瞻去任。夏
日有懷詩。忠孝王家千柱宮。東坡作吏五年中。
中和堂上東南頰。獨有人間萬里風。○有美堂
嘉祐二年。龍圖學士梅摯出守杭州。仁宗賜之
詩云。地有湖山美。東南第一州。剖符宣政化。持
橐輟才流。暫出論思列。遙分宵旰憂。循良勤撫
俗。來暮聽歡謳。摯到郡。即以有美二字名其堂。
歐陽文忠公爲之記。畧云。舉天下之至美。與其
樂。有不可兼者多矣。故窮山水登臨之美者。必
之乎寬閒之野。寂寞之鄉。而後得焉。覽人物之

盛麗。誇都邑之雄富者。必據乎四達之衢。舟車
之會。而後足焉。蓋彼放心於物外。而此娛意於
繁華。二者各有適。然其樂不可得兼也。羅浮天
台。衡嶽廬阜。洞庭之廣。三峽之險。號爲東南奇
偉秀絕者。乃在乎下州小邑僻陋之邦。此幽潛
之士。窮愁放逐之臣之所樂也。若乃四方之所
聚。百貨之所交。物盛人衆。爲一都會。而又能兼
有山水之美。以資富貴之娛者。惟金陵錢唐然
二邦皆僭竊於亂世。聖宋受命。金陵以後。服見
誅。今其江山雖在。而頽垣廢址。荒烟野草。過者

躑躅而悽愴。獨錢唐自五代時。知尊中國。効臣
 順。及其亡也。頓首請命。不煩干戈。今其民幸富
 足安樂。又俗習工巧。邑屋華麗。蓋十萬餘家。環
 以湖山。左右映帶。而閩商嶺賈。風帆海舶。出入
 於江濤浩渺。雲烟杳靄之間。可謂盛矣。而帥是
 邦者。必皆朝廷公卿大臣。若天子之侍從。又有
 四方遊士。為之賓客。故喜占形勝。治亭榭。相與
 極遊覽之娛。然與其所取。有得於此者。必有遺
 於彼。獨所謂有美堂者。山水登臨之美。人物邑
 居之繁。一寓目而盡得之。蓋錢唐兼天下之美。

而斯堂者。又盡得錢唐之美。焉宜乎公之甚愛
 而難忘也。○蘇子瞻與陳太守有美堂夜歸詩
 娟娟雲月稍侵軒。潏潏星河半隱山。魚鑰未收
 清夜永。鳳簫猶在翠微間。淒風瑟縮經絃柱。香
 霧霏迷著鬢鬟。若喜使君能共樂。萬人爭看火
 城還。○石林軒。宋郡守孫沔建。燕思閣。取立石
 七株。置閣前。號七賢。有蒲宗孟。更名石林軒。
 自梵天寺。而北折而西。迴繞松礎。為勝果禪寺。月岩
 勝果寺。唐乾寧。置。無著禪師建。吳越王鏐。彌陀
 觀音。勢至。三佛。及十八羅漢像。於石壁。宋慶曆

初賜額崇聖寺元至三閣樓
皇明洪武初

初興初禪師建又燬永樂十五年重建松徑盤紆

目餘澗淙潺湲唐僧處默詩路自中崕上盤回出薛

蘿到江吳地盡隔岬越山多古木叢生謁遙天

浸白波下方城郭近鐘磬雜笙歌○亦甫詩

登高見山水身在水中央下視樓臺處空多樹

木蒼浮雲連海氣落日動湖光偶坐吹橫笛殘

聲入富陽○僧圓法師詩并序云勝果名刹相

望而高軒虛閣盡得江山之勝槩因誦謝宣城

天際識歸舟雲中辨江樹之句頗類彼景用以

爲韻成詩十章寄勝果裕師開士雖不足發揮

騷雅庶寫相懷之心爾○江色杳無極渺渺接

遙天歸帆帶夕陽去鳥衝寒烟幽景不同觀遐

想成斯篇○樓閣聳岩峩參差極雲際高牕曉

色鮮晚景餘霞麗寥寥群動息冥心遠塵世○

冷淡杳難群幽趣唯吾識高情薄雲漢清談潤

金石不學浮世人奔名競雕飾○惟靜百慮忘

軒開萬象歸空江答夜鐘高嶠畱殘暉幽砌絕

塵蹤孤雲自依依○顧惡如探湯觸物類虛舟

他人莫已知此道本吾求獨坐時相懷斜陽下

危樓○崔嵬高山側。觸石生片雲。自將霖雨期。不與塵土群。杳杳遊太虛。對此幾思君。○高躋將誰親。幽棲白雲中。開階吐蒼苔。古木生清風。時將西竺詩。講義訓來蒙。○靜躁各所好。是非安能辯。聲利如我仇。雲泉若牽挽。寂寂深林中。芳蘭自堪搴。○群峰聳危碧。倒影沉空江。清景生晚晴。冷色涵虛牕。逍遙縱吟賞。能使吾心降。○海日照吟軒。江風動庭樹。此景樂閒情。何人識高趣。登樓獨南望。杳杳空烟霧。○王伯安詩。江上但知山色好。峰迴始見寺門開。半空虛閣

有雲住。六月深松無暑來。病肺正思移枕簟。洗心兼得遠塵埃。富春咫尺烟濤外。時倚層霞望釣臺。○深林容鳥道。古洞隱春蘿。天迴聞潮早。江空得月多。米霜叢草木。舟楫玩風波。巖下幽棲處。時聞白石歌。

月巖石壁削立有隙如鏡中秋蟾魄斜圓清輝滿隙若合璧然其傍有月榭陳天瑞詩惟石堆雲轟太空女媧鍊出廣寒宮一輪常滿陰晴見萬古無虧晝夜同搗藥聲繁驅白兔漏天孔正透清風光明自照如來境肯學姮娥西復東○王

伯安飲月榭別王侍御赴兩廣詩湖山久係念
塊處限形蹟遙望一水間十年靡由即軍旅起
衰廢驅馳豈遑息前旌道回岡取捷上崎側新
構鬱層椒石門轉深寂是時霜始降風淒群卉
析壑靜響江聲聽虛涵海色夕陰下西岑涼月
穿東壁觀風此餘情撫景見高臆匪從群公餞
何因得良覲南徼方如燬救焚豈辭亟來歸幸
有期終遂尋幽僻

月岩之左爲中峰其右爲宋殿前司營

中峰之上有亭曰天峰孤嘯少師夏公謹所題峰

之後爲三佛石僊姑洞郭公泉臥醉石放光石
宋殿前司營爲親軍護衛之所俗稱御校場者是
也山頂石筍林立蒼翠玲瓏森若朝拱錢氏命
爲排衙石第二峰舊有白塔塔西小徑石壁夾
道通人往來名爲石術宋初名公多題刻其間
從此南望則長江帶繞北眺則西湖鑑開山下
有金星洞通明洞柳浦皆蕪汨不可踪蹟蘇子
瞻金星洞銘云寶山南麓鳳左翅驚雷劃石逋
蚪起疑陰嘘堅出怪瑋是生神草肖蒼虺離離
赤痣挾脊尾飛流丹石決癰疽金星非實特取

似施及山石亦見謂凡名相因皆此比。○鄭繼之登御校塲塲塲故宮詩萬峰雲木鬱蒼蒼古壘仍存閱武塲南渡關河雙眼盡中原風物百憂傍尚傳草莽開黃屋想見龍蛇繞御床往事只今俱灑淚兩階干羽意何長。

峰畔舊有冲天觀望海亭介亭崇聖塔並廢。○冲天觀在介亭後。○介亭宋祖無擇建蘇子瞻登介亭餞楊傑次公詩監輿西出登山門喜與我友尋僊村丹青明滅風篁嶺環珮空響桃花源前坡欲上已蠟屐黑雲白雨如傾盆今晨積霧

卷千里豈畏觸熱生疥根在家頭陀無爲子與青山爲弟昆孤峰盡處亦何有西湖鏡天江抹坤臨高麾手謝好住清風萬壑傳其言風回響答君聽取我亦到處隨君軒。○次劉景文詩澤國梅雨餘衰年困蒸溼高堂磨新磚頗覺利腰足松根百尺井兩縷飛淨綠流觴聚兒童一咲爲捧腹清風信可馭剛氣在巖麓始知共此世物外無三伏長歌入雲烟不待絃管逐西湖真西子烟樹點眉目濤江少醞藉高浪翻雲屋俛仰撫四海百世飛鳥速遠追錢氏餘近吊祖

西清志卷之七
侯躅吾生如寄耳寸晷輕尺玉誰似劉將軍逸
韻謝邊幅千言一揮手五車不再讀春巖彩鷄
舞月峽哀猿哭朝先啼鳩起暮與寒螿續我老
毀吟哦賴君時擊觸從今事遠覽發軔此幽谷
清游得三昧至樂謝五欲莫作狂道士氣壓劉
師服并次袁公濟詩昏昏墮醉夢禁此六月
溽君詩如清風吹我朝睡足登臨得佳句江白
照湖綠袖手猶不言默藁已在腹是時風雨逼
雲霧歸麓星帶微雨金火爭見伏惜哉此
清景變滅不可逐歸來讀君詩耿耿猶在且却

思少年日聲價爭場屋文如翻水成賦作义手
速秋風起鴻鴈我亦繼華躅那知君蹭蹬獨泣
荆山下相見南新道青山垂破幅早知事大謬
恨不十年讀莫嗟馮唐老終勝賈誼哭今年復
爲僚舊好許重續升沉何足道等是蠻與觸共
爲湖山主出入窮澗谷衆馳君不棄入棄我所
欲何時神武門相約挂冠服○陳述古召飲介
亭詩西風初作十分涼喜見新橙透甲香遲暮
賞心驚節物登臨病眼怯秋光慣眠處士雲庵
裏倦醉佳人錦瑟傍猶有夢回清興在臥聞歸

路樂聲長○崇聖塔高七級二十餘丈宋景祐
初建慶曆中郡守鄭戩請加崇聖之號南渡毀
入行宮

又西爲樓雲庵

樓雲庵小雲石海涯別業也其父楚國公貫只哥
雲石遂以貫爲氏號曰酸齋年十二三膂力絕
人使健兒驅三惡馬疾馳持槊立而待馬至越
二而跨三運槊生風觀者辟易或挽強射生逐
猛獸上下峻阪如飛稍長折節讀書日五行下
庵其藏修之所也由門經山而西可達龍華寺

又南爲包家山山川壇

包家山多桃花宋時有關廟曰蒸霞二月遊人最
盛號小桃源董嗣杲詩絳霞蒸日透林梢一簇
南山尚姓包冷水峪邊苔色老冲雲樓下樹陰
高園隣古道傳耕籍臺倚青城想拜郊欲趁桃
花尋隱去關門無鎖不須敲○錢思復詩平生
鹿門趣有意此誅茅地控江分越山因人姓包
海鷗飛落日野馬牧荒郊流水花千樹重期載
酒肴○張仲舉清明遊包家山詩二首遠近紅
千樹繁開奪豔霞月明寒食雨春老上陽花輦

路迷游躅宮詞入夢華。東風葵麥恨。回首野人家。○太液曾來鵠高臺舊影娥美人黃土盡。故國白雲多。野草荒神籍。宮蓮怨棹歌。羞兒洗馬處。斜日滿寒波。

山畔舊有上善庵福泉庵並廢○上善庵淳祐七年建俗名白衣五聖廟○福泉庵淳祐四年建有龍王井方丈餘雖旱不竭又名冷泉峪

山川壇洪武元年先擬建山川壇於城西北風師壇於城東北雨雷師壇於城西南二年詔風雲雷雨合一壇尋又詔併山川共為一壇八年又

詔併城隍合祭

壇之左為正宗庵右為三一庵

正宗庵元至大間僧大方建

三一庵白玉蟾煉丹之所有像存焉白玉蟾南海瓊州人當宋乾道間於黎母山中遇神人授洞玄雷法遨遊江湖修真訪道嘉定中召赴行都對御稱旨命主太乙宮更結小庵於此一日去不知所往庵中有得月樓前有石池白玉蟾詩風吹玉露洗銀濛爽氣平分桂影高把笛倚樓人不寐此時直擬數秋毫千嵯爽氣已平分萬

里青天輾玉輪。起向錢唐江上壘。相逢都是廣寒人。○貫酸齋詩。茅棟蕭蕭水石間。放懷終日對林巒。夢回不覺丹臨砌。吟罷始知身倚欄。藥碓夜春雲母急。石甌秋迸井花寒。群魚亦得逍遙樂。何用機心把釣竿。

又南爲大慈禪寺

大慈寺俗稱包山寺。宋乾道九年僧德殊建。淳熙間賜額。

西湖遊覽志第七卷終

西湖遊覽志第八卷

北山勝蹟

出湧金門而北爲豐樂樓

錢唐田 汝成 輯撰

豐樂樓宋初爲衆樂亭。尋改聳翠樓。政和中改今名。淳祐九年安撫趙與憲重構之。瑰麗崢嶸。掩映圖畫。俯瞰平湖。千峰連環。一碧萬頃。柳汀花塢。歷歷欄檻間。亭榭翬飛。遠近映帶。遊撓冶騎。菱歌漁唱。往往會合於樓前。元末乃燬。嘉靖二十年郡守陳公仕賢毀柳洲寺而重建之。爲賓

使館所題曰柳洲別館。館後有樓，題曰豐樂，存舊蹟也。編修金璐爲之記。宋趙忠定公詠豐樂樓柳梢青詞：水月光中，烟霞影裏，湧出歌臺。空外笙簫，雲間笑語，人在蓬萊。天香暗逐風回，正十里荷花盛開。買箇小舟，山南遊遍，山北歸來。

○元楊仲弘詩：崢嶸飛構，歷名邦。西壘平湖東，望江氣合重。玄蒙沈澗，標存九域。奠洪龐，朝來散霧縈。朱拱夜后，流星透碧牕。倚遍欄干，愁目眩。飛鳶旋轉，故雙雙。

柳洲寺宋開寶間錢王建，本名資福院。院傍有通

元庵會靈廟，即五龍王祠。開禧元年趙師異佞爲柳洲寺。洲傍有黑亭子、灣呂洞賓祠、集賢亭。上船亭養魚莊，環碧園迎光樓，劉氏園，並廢。○上船亭，賈似道建。養魚莊，環碧園，皆楊和王別業。軒亭皆高宗御書。○迎光樓，張循王別業。○劉氏園內侍劉玉外宅。

出錢唐門瀕湖爲王蓮堂，折而北爲來鵲樓。

王蓮堂舊在府治中。宋時安撫魏克愚徙建于此。都人競渡湖中，以此爲奪標之所。久廢。皇明嘉靖二十一年，按察僉事劉聖之欲建賓館于

此間名于汝成汝成爲陳故實且曰興滅闡德以無忘前人復其名爲王蓮堂何如公欣然首肯乃濬池環門樹以白荷甫成而公以憂去扁額尚未揭也但人但稱月牙公館云

來鵲樓邑人張文宿別墅也嘗爲晉江令有雅致寄傲湖山構樓湖畔棟宇經始有鵲巢焉遂名來鵲樓

錢唐門沿城而北舊有錢武肅王廟九曲城菩提院真覺院法濟院妙因院寶嚴院普潤寺玉壺園聖湖樓賈府上船亭謝府新園擇勝園隱秀

園並廢○錢武肅王廟王名鏐臨安石鑑鄉人驍勇有智畧壯而微販鹽自活唐僖宗時王儼芝寇兩浙命都將董昌討鎮之鏐屬昌部平朱直拒黃巢斬劉漢宏累功拜杭州刺史擒薛明破徐福加防禦使進蘇杭等州觀察使新作杭城自秦壘山由夾城東亘江干泊錢唐湖霍山范浦凡七十里進鎮海軍節度使封開國公會董昌反越州鏐受詔討滅之進彭城郡王加中書令圖形凌煙閣名其營曰衣錦營封其山曰衣錦山改封越王再改吳王梁開平初進封吳

越王築捍海塘建候潮通江等門時江濤怒噴
命強弩數百射之濤爲斂却還擊西陵尋授天
下兵馬都元帥後唐同光初賜玉冊金印長興
三年卒年八十三謚武肅篤孝善撫士卒臨政
勤警無倦容當中原繹騷而保鎮疆域民甚德
之五傳至忠懿王俶當宋太祖受命時納土子
孫代爲顯官○九曲城有五聖廟蘇漢臣畫壁
○菩提院本錢惟演別墅也捨以爲寺有白蓮
綠野等堂碧玉四觀披瀝等軒南漪迎薰澄心
涵碧玉壺雪糴瑜等亭後併入昭慶寺周紫芝

菩提小軒晚晴詩杭頰雌雄本自殊淡粧濃抹
是吾姝滿傾漲玉千鍾酒來看鎔銀百頃湖白
鳥去邊山潑黛綠蒲疎處雨跳珠不知好事王
摩詰貌得西山落照無○真覺院即隱淨庵○
法濟院舊名觀音院有明軒爽軒○妙因院即
慈光庵○寶嚴院俗呼九曲院○普潤寺宋淳
熙初建元末燬○王壺園宋理宗時御園也本
鄜王劉琦別業後屬官家林亭幽雅長夏森寒
張輿詩林亭絕幽迥長夏綠雲香明月出山小
白蓮承露涼譙鼓樓頭急吳歛風外長儵然王

壺內。渾與世相忘。○望湖樓在昭慶寺前。錢王所作。一名先得樓。潘閔詩。望湖樓上立。竟日懶思還。聽水分他界。看雲過別山。孤舟依岸靜。獨鳥向人間。回首重門閉。蛙聲夕照間。蘇子瞻詩。黑雲翻墨未遮山。白雨跳珠亂入船。卷地風來忽吹散。望湖樓下水如天。放生魚鱉逐人來。無主荷花到處開。水枕能令山俯仰。風船解與月徘徊。未成小隱成中隱。可得長閒勝暫閒。我本無家更安住。故鄉無此好江山。王介甫詩。水光山氣碧浮浮。落日將歸又少留。從此祇應長入

夢。夢中還與故人遊。○謝府新園故甘氏園。爲太后別墅。在惠照齋宮西。有道院村莊水閣。一碧萬頃。眉壽等堂。湖山清觀。歇涼等亭。備華極。邃架亭湖中。每元夕。亭館皆垂水晶簾。放燈上下。輝映金碧。奪目。士女縱觀。往往得遺簪墜珥。元時元帥夏若水據有之。○擇勝園在九曲城下。宋秀王別墅。理宗御書。擇勝愛閒二扁。○隱秀園。劉鄜王別墅。

折而西。過溜水橋。爲昭慶律寺。

溜水橋。洩湖水以入下湖。可通新河壩。

昭慶律寺晉天福間吳越王建宋乾德二年重修
海內縉流雲集於此推其長老能通五宗諸典
者登壇說法敷陳具戒其徒跪而聽之名曰受
戒至今行之天禧初有圓淨法師學廬山慧遠
結白蓮社縉紳之士與會者二十餘人運使孫
何爲之記南渡後以其地爲策選鋒軍教場尋
復爲寺元末燬 皇明洪武間重建成化間燬
雲水僧廣慎徃營之宋陳堯佐詩湖邊山影裏
靜景與僧分一榻坐臨水片心閒對雲樹寒時

落葉鷗散忽成群莫問紅塵事林間肯暫聞
王元之詩夢幻吾身是偶然勞生四十又三年
任誇西掖吟紅葉何似東林種白蓮入定雪龕
燈焰直講經霜殿聲聲圓謫官不得餘杭郡空
寄高僧結社篇

昭慶寺之北爲慶忌塔

慶忌塔者春秋時吳王闔閭既弒王僚僚子慶忌
奔衛闔閭患之謀諸伍員員進細人要離俾之
行刺要離者細而寡力迎風則僵負風則伏王
語以慶忌之勇謂其不如也要離曰臣能殺之

臣詐以負罪出奔願王戮臣妻子斷臣右手慶
忌必信臣矣王從之要離乃詐奔諸侯宣怨于
路遂如衛見慶忌言闔閭無道願因王子之勇
可得也慶忌信之揀練士卒與還襲吳渡江要
離坐於上風因風之勢以矛鈎其冠順風而刺
慶忌死葬於此其地在宋爲豐儲倉前有石池
深不可測宋咸淳六年七月池水壁立浮苴登
木蕩突久之或云中有大龜數百年者故興妖
如此又時有怪物出水若鐵棺然四丈又二
自昭慶寺而西過石函橋爲放生亭

石函橋唐刺史李泌建有水閘泄湖水以入下湖
沿東西馬塍半角堦至歸錦橋凡四派白樂天
記畧云北有石函南有窻決湖水一吋可溉田
十五餘頃每一復時可溉五十餘頃其去郡別
州民詩云耆老遮歸路壺漿蒲別筵甘棠無一
樹那得淚潸然稅重多貧戶農飢足旱田惟畱
一湖水與汝救荒年

放生亭在寶石山麓宋天禧四年王欽若請以西
湖爲放生池禁民採捕郡守王隨爲之記有碑
存焉慶元四年趙師弄建德生堂飛泳亭於橋

西漢志卷之八
畔理宗御書並廢

又北過羊坊橋小溜水橋爲靈衛廟

羊坊橋宋時滌羊之所也有酒庫瓦子在焉其西

爲古柳林

小溜水橋俗稱水磨頭其下爲棕毛場

靈衛廟宋建炎三年金酋完顏宗弼犯臨安郡守

康允之退保赭山錢唐令朱躡鳩鄉兵二千邀

擊之力戰死尉將金勝祝威復集凋兵據葛嶺

編竹覆泥爲大途以誘賊賊騎颺至蹶蹶而踣

仆者鱗疊橫屍山委金人大駭遁赤山得奸細

爲導由南壁入勝威被執死之郡人感其忠節

以馬革裹屍駢塋雲洞之右立祠祀之後人并

以祀躡淳祐間賜廟額曰靈衛至今人稱金祝

廟者從始建意也每歲七月一日守臣致祭蓋

金公誕辰云

石函橋之北舊有趙郭園水丘園梅岡園聚秀園

錢氏園張氏園王氏園萬花小隱園竹所雲洞

園瑤池園錢唐縣尉司賁勝院洞明庵精進院

延慶院澄寂院並廢○梅岡園者宋韓蘄王別

業也廣一百三十畝有樂靜堂清風軒皆高宗

御書水閣梅坡芙蓉堆花竹輝映皆聚景之所
四時可遊吳立夫花園老卒歌斬王手種紅錦
花十載不掛鐵錘鍛花園老卒守花樹睡着花
磚聞曙鴉白頭白盡身無事古塞沙塵戰餘騎
多士如雲足健兒一竒在腹終憔悴青銅萬緡
滿地光寶函矯節賜夷王宮粧粉豔去酣酒海
貨珠賸歸壓檣王家舍兒驚吐舌御府珊瑚碎
飛雲口猶乳臭却帳前矍鑠一翁嗟棄捐君不
見天下英雄本奴虜左鼻成龍右鼻虎頸血淋
漓思繫鼓史傳沉埋誰比數花落花開幾風雨

○雪洞園者楊和王別業也培土爲洞屈曲通
行圖畫雲氣其傍有麗春臺青石爲坡不斷礮
齒春時令麗人歌舞爲戲得上坡者受賞園內
有萬景天全方壺蕭碧天機雲錦紫翠間濯纓
五色雲等亭榭玉龍玲瓏金粟天砌等臺洞戶
牖輝煌花木蟠鬱窮極麗雅盛時凡用園丁四
十餘人監園使二人洞後有天龍庵嘉定間惠
開法師建○瑤池園中貴呂氏外宅也池週二
里植菱芰池側有寶勝院○錢塘縣尉司相傳
爲王子高故居宋隆興間建時宇內承平茲邑

特繁麗仁宗常覽西湖圖嘆曰真僊尉也遂建
真僊亭蘇子瞻常率賓僚遊焉建英遊閣林和
靖訪謝尉賦秋水芙蓉詩建詠物樓○洞明庵
咸淳中朱端卿捨宅建○精進院舊名儲修晉
開運間建○延慶院舊名興化寺○澄寂院近
桃花街口

過石函橋而西爲寶石山崇壽禪寺寶所塔壽星石
石屏風獅子峰屯霞石看松臺落星石乳泉井一勺
泉天然圖書閣

寶石山本名巨石山高六十三丈周一十三里錢

王封爲壽星寶石山羅隱爲之記其下爲寶稷
山山下有乳泉佛足泉其絕頂爲寶峰

崇壽禪寺吳越王之臣吳延爽者請東陽善導和
尚舍利建塔於山巔附以佛廬宋開寶初賜額
曰崇壽院洪武初有高僧慧炬出家院中明天
台教時江濤大溢炬說法洒淨水止之隄賴以
不圯杭人稱炬菩薩云

寶所塔延爽建九級尋崩咸平中僧永保以日晷
募緣十年始復其舊目光如故保有戒行人呼
師叔遂稱保叔塔也塔門舊有張卽之書湖山

勝槩四字今移置淨慈寺閣元延祐中院塔俱燬僧可周建至正末又燬僧慧炬重建至七級而止皇明成化間燬弘治間僧可勝重建一夕大雷擊死遊僧三人大蛇一條重五十觔腹中白子數十枚塔漸崩廢正德九年僧文鏞重建又築西方殿於塔後挹涼亭於山下嘉靖元年塔燬二十二年僧來果重建來果山西人有戒行募緣多助咸稱老山西又有全真號浪滔滔者亦與協力故能飾復舊美錢思復詩金刹天開畫鐵簷風語鈴野雲秋共白江樹晚逾青

鑿屋巖藏雨黏崖石墜星下看湖上客歌吹正沉冥

壽星石舊名落星石錢王改今名一在塔後一在看松臺下各大數十圍塊然無根望之如斲

石屏風獅子峰皆以形似名之石屏風下舊有石屏院獅子峰一名巾子峰林和靖詩巾子山頭烏臼木微霜未落葉先紅者是也

屯霞石色赭如霞介立嵯岬

看松臺去寺左百步所俯臨巨壑凌駕松杪松下有石圓如隕星施儒詩茲山亦何奇而喜遊人

少我本烟霞徒。一丘願終老。王顥詩樹益珠林。
勝花開翠壁。妍清秋一舒嘯。畫裏着詩僊。

乳泉井去看松臺。百步所泉白而甘。

一勺泉在崇壽院右壁。太僕丞張瑛名之。詩云絕
頂盤峰秀。蛟龍擁地蓮。塔樓南斗下。僧問劫灰
年。鬼斧摧堅石。神功琢湧泉。派疑銀漢瀉。溜訝
玉龍穿。沆瀣雲根滿。分明琬琰鐫。一泓通海眼。
孤浸立山巔。正正華沉月。亭亭碧醮天。味翻流
乳滑。嵌洩濺珠圓。魚躍金梭見。虹垂寶帶懸。洗
甌僧瀹茗。供佛客擎錢。幾許詩脾沁。徒爲俗慮

牽靜焉。仁者學湛若。定心禪。渴想斟瓢飲。酣宜
漱石眠。何人識恬淡。終日夢潺湲。莫怪頻來此。
煩痾頓覺捐。

天然圖畫閣在寺右。一勺泉之陽。少師夏公謹詩。
客到西湖上。春遊尚及時。石門深歷險。山閣靜
憑危。午寺鳴鐘亂。風湖去舫遲。清樽歡不極。醉
筆更題詩。

崇壽院前舊有金牛護法院。巾子峰前有金輪梵
天院。並廢。

寶石山麓爲大佛禪寺。沁雪泉。

大石佛舊傳爲秦始皇纜船石宋宣和中僧思淨者當兒時見之作念曰異日出家當鑄此石爲佛及長爲僧妙行寺遂鑄石爲半身佛像飾以黃金構殿覆之遂名爲大石佛院元至元間院燬佛像亦剝落

皇明末樂間僧志琳重建勅賜爲大佛禪寺弘治四年僧未安重修寺畔天有塔俗稱壺瓶塔乃元時西河僧所建張輿詩葛僊嶺西大石頭祖龍東來曾繫舟不聞登僊入蓬島徒見作佛如嘉州地湧半身雲水繞山開一百金碧浮幾回劫火燒不盡空對湖光飛

白鷗○吳立夫詩手撫一片石昔爲滄海濤

皇或繫纜萬里浩無津世間本妖妄何處有隱真蓬萊不可到弱水空飆輪徐生或云去方士先避秦童男繼童女五穀雜貨珍島嶼止不返蛟龍化其民非惟長年藥未隔戰馬塵人君却未悟望望轉東巡山鬼覺將死海魚祠作神侯生奉圖籙譏諫極所陳驪山闕鳧鴈金櫛竟沉淪惜茲鑿不遠遺蹟畱千春經營大屋覆刻斲青蓮身漢唐幾英主覆轍猶爾遵我恐石有語神僊多誤人

沁雪泉在佛身右壁崇陵方思道題

寺畔舊有相巖院冠勝軒西有水月園大吳園小
吳園嘉澤廟孫花翁墓金廢○相巖院晉天福
二年錢氏建有十三間樓樓上貯三寸佛一尊
蘇子瞻治郡時常判事於此○水月園高宗以
賜楊和王存中者御書水月窟孝宗朝更賜秀
王伯圭有水月瀛玉林堂俯挹澄湖萬柳成幕
燕遊者多集焉○嘉澤廟即水僊祠梁大同間
建以奉錢唐湖龍君錢銀碑記宋時移建於蘇
堤○孫花翁墓翁名惟信字季蕃仕宋光宗時

棄官隱西湖工爲長短句好藝花卉自號花翁
家徒壁立無旦夕之儲彈琴讀書晏如也既卒
安撫趙與憲葬之墓近水僊王廟仇仁近詩水
僊分地葬詩人一片荒山野火焚薦菊有亭今
作圃掃松無子謾畱墳蝸牛負殼粘碑石老鶴
携雛入隴雲欲把管絃歌楚些却憐度曲不如
君

又西爲智果禪寺參寥泉

智果寺舊在孤山吳越王所建宋紹興間徙築於
此先是蘇子瞻守杭州與智果院禪師參寥子

善名其所居泉曰參寥泉寺既徙北山有泉適
出寺後好事者仍名參寥泉以志舊蹟元末燬
皇明洪武初僧可祥惠炬重建其梁題云元祐
五年歲在庚午二月辛卯朔二十五日乙卯上
梁蓋子瞻手書自孤山移置者○張光弼詩佳
遊在上巳屬此清明前春景已云暮風光猶未
暄往尋智果寺竟得參寥泉景物豈殊昔人世
自更遷邈哉長公詠風流想當年我輩復登臨
花界何因緣古佛儼香閣真詮積華軒境超萬
念空道勝諸妄捐緬懷此會難徘徊未云還申

章續芳藻莫或來者傳○吳立夫詩古寺湖水
土寺門但菰蒲一泉湛如玉巖骨早不枯粵從
參寥鑿得與蓋壤俱東坡或茗宴西嶺猶松筍
人誰問詩侶世頗笑酪奴瓦甃縱然在木瓢知
已無汲水宜汲深塵心非轆轤別禪勝別味俗
舌空醍醐老僧久不識香地冷宿孟卓哉郡太
守遺像擁眉鬚閒來試我酌霧雨變須臾尚持
金芙蓉便踏赤鱗魚

又西為顯功廟

顯功廟以祀宋布衣岳璠者璠錢唐霍山人建炎

三年十二月完顏宗弼由獨松關犯杭州守臣
遁於赭山瑭乃捐家資以充軍餉推錢唐令朱
蹕為謀主金祝二尉為先鋒率死士誘虜由西
溪並天竺東來塹葛嶺編竹覆泥以陷之虜後
從南壁以寇城西瑭力戰死焉郡人感之為請
於朝立祠於此

又西為錦塢初陽臺葛翁井

錦塢在寶雲山之東宋時此地花卉燦然若錦故
名錦塢

初陽臺在山巔葛僊翁修真時吸日月精華於此

高朗宜遠眺清曉烟消日出海底爛然竒觀楊
仲弘詩彩雲相幕塵華露共嬋娟在水軍疑墮
當空孰使懸潛虬精魄動宿鶴羽毛鮮寂寂丹
臺夜相從訝得僊○丹臺欲上路盤盤秋月圓
時正好觀已作高亭凌崖壘豈辭深夜倚欄干
雲封大壑蛟龍睡露下蒼林翡翠寒下顧塵寰
悲迫阨致身何止在雲端○張伯雨詩初陽臺
上新亭好一曲笙簧石壁開驚起玄真狂道士
步虛飛下玉清臺

葛翁井去智果寺西南可數十步上方下圓相傳

爲葛稚川投丹之所今在馬氏園宣德間大旱
馬氏甃而涸之得石匣一石甃四匣固不可啓
瓶中有丸藥若芡實者啗之絕無臭味乃棄之
施澳翁獨啗一枚後年百有六歲并遂淤惡不
可食以匣投之甘冽如故張伯雨詩一宿葛翁
丹井上化爲蝴蝶夢魂清湖田涼蛤四散吠烟
寺曉鐘相逝鳴孤嶼橫陳爲王几初陽煥爛似
霞城拏舟又入水雲去還我風篁雪竇聲○葛
洪井上訪真居一飲丹泉足自如拂袖莫嫌狂
散甚子非知我我知真

錦塢西舊有普安院治平寺王清宮雲巢樓
○治平寺初名錦塢庵僧法聰建有烟雲閣○
王清宮宋紹定初建理宗御書扁元至正末燬
趙達夫白珽鮮于樞聯句二首湖田漠漠水禽
飛達夫堤柳斜斜帶夕暉樞二月江南好天氣
珽初陽臺上愜春衣樞巾子峰頭艤釣船達夫
又西初陽臺上坐鳴絃出雲高樹明殘日珽過雨蒼
苔泫細泉絕俗誰能繼遐躅樞凌空我欲學飛
僊達夫還家正恐鄉人問珽化鶴重來知幾年
樞○雲巢樓在王清宮內張伯雨詩初陽臺上

白雲多。雲裏層層玉樹歌。栖息一枝綠未穩。飛
翻千仞柰危何。雨中幕燕雷驚起。峰頂笙鸞月
送過。好在丹梯無百尺。屋頭看盡白鷗波。

又西爲寶雲山瑪瑙講寺後僕夫泉

瑪瑙講寺故名瑪瑙寶勝院在孤山晉開運三年
錢氏建宋大中祥符間高僧智圓重修紹興間
徙築於此元末燬

皇明末樂間重建陟山

之巔石磴數百級有閣凌空特起憑眺最勝俗
稱瑪瑙山居者是也陳諭詩雨霽佛屋明苔徑
隄深曲折樹搖高露驚草密暗泉咽前林或清磬

烟燈遠欲滅寄謝塵中人與君從此別

後僕夫泉元僧芳洲所鑿也先是智圓居孤山有
僕夫藝竹得泉遂號僕夫泉後徙寺茲山藉葛
井以汲寺僧韡之芳洲鑿地得此遂名後僕夫
泉

寺西宋有養樂園半春園小隱園瓊華園寶雲庵
並廢○養樂園賈似道別墅也內有光祿閣春
雨觀嘉生堂生意生物之府似道旣敗有人題
其壁曰老壑曾居葛嶺西遊人誰敢問蘇堤勢
將覆餗不回首事到出師方噬臍廢圃更無人

作主。敗垣惟有客留題。筭來祇是孤山耐。依舊
 梅花伴月低。蓋似道嘗往園中有遊騎過門者
 輒為偵事者擒入有官者黜有財者籍其妾兒
 闕瞰亦縛投火中○半春小隱瓊華皆史彌遠
 別墅也臺榭工麗在在殊宜○寶雲庵宋乾德
 二年吳越王建名千光王寺雍熙二年改今額
 寶慶間為邵王攢所元至正末燬內有靈泉井
 月窟澄心閣南隱堂妙思堂蘇子瞻次寶雲僧
 外仲殊雪中遊湖韻詩寶雲樓閣闢千門林靜初
 無一鳥鳴閉戶莫教風掃地捲簾疑有月臨軒

水光瀲灩猶浮碧山色空濛已歛昏乞得湯休
 奇絕句始知鹽絮是陳言

又西為葛嶺葛僊翁墓

葛嶺上有葛僊翁墓葛洪字稚川晉時人博聞深
 洽江左絕倫好神僊導養之術見高士郭文舉
 於大滌山中覲德而悟道結廬西湖修真著書
 號抱朴子嶺上有甘露泉梅泉薩天錫詩煉丹
 僊子渺茫間一夕乘風去不還火冷爐頭灰已
 盡雲封洞口嶺長間千年瑞氣生瑤草夜半天
 風響佩環真境空明自今古烟塵依舊隔瀛寰

○吳立夫登初陽臺謁抱朴子墓詩人生擾擾
間頗覺天地窄我憶抱朴子高臺眺空碧初陽
出山上照破萬古石丹光動鼎鐺霧氣浮冠寫
遺書上下卷道妙或黃白老衰及病瘦辛苦為
形役豈伊鸞鳳姿終以狐兔宅尸解本無形空
飛寧復蹟郭君曾有傳勾漏恍所歷降子倘可
問稚川特未隔幽林來颺颺缺井守蜥蜴神僊
果何人海嶽長戲劇世傳老聃死吾謂方朔謫
虛墳誰所為怪樹獨悲激滿前湖與山秋色落
几席因茲此爾魂目送天邊翮

嶺上舊有招賢寺嶺下有集芳園壽星院善住
香月隣挹秀園秀野園趙紫芝墓金廢○招賢
寺唐德宗時郡人吳元卿爲六宮內使棄官學
道結庵山中開運三年錢氏改建爲寺有尉遲
恭井蒙泉東坡書扁白樂天紫陽花詩序云招
賢寺有山花一樹色紫氣香芳麗可愛頗類僊
物而人無識者因以紫陽花名之詩云何年植
向僊壇上早晚移栽到梵家雖在人間人不識
與君名作紫陽花○集芳園故張婉儀別墅也
紹興間收屬官家藻飾益麗有蟠翠雪香翠岩

倚綉挹露王蓋。清勝諸扁皆高宗御題。淳祐間
理宗以賜賈似道。改名後樂園。樓閣林泉幽暢
咸極。古木壽藤多。南渡以前所植者。積翠迴抱
仰不見日。架廊疊磴。幽渺透迤。隧地通道。抗以
石梁。傍透湖濱。飛樓層臺。涼亭燠館。華邃精妙
前挹孤山。後據葛嶺。兩橋映帶。一水橫穿。各隨
地勢以構築焉。理宗爲書西湖一曲奇勛扁。度
宗爲書秋壑遂初容堂扁。又有初陽精舍警室
熙然臺。無邊風月。見天地心。琳琅步歸舟。甘露
巖。諸勝。元大德初。僧滿月即其址。建福地院。趙

子昂爲之記。至正末燬。林景熙詩。當年構華居。
權燄傾衛霍。地力窮斧斤。天章煥丹臆。花石擬
平泉。川途致茲壑。唯聞丞相嗔。那後天下樂。我
來陵谷餘。山意已蕭索。蒼生墮巔崖。國破身誰
託。空悲上蔡犬。不返華亭鶴。丈夫保勲名。風采
照麟閣。胡爲一聲鉦。聚鐵鑄此錯。回首草萊碑。
荒烟掩餘作。○壽星院有盃泉。靈泉。寒碧軒。此
君軒。平秀軒。垂雲亭。明遠堂。其上有閣曰江湖
偉觀。安撫趙與憲。建蘇子瞻守杭。日常遊焉。入
門即悟前身曾到。歷言院後殿閣山石之名。無

一遺謬。故湖中詩詠於此居多。其次周長官韻
詩。瑠璃百頃水。僊家風靜湖。平響釣車寂。歷蹠
松。歎晚照。伶俜寒蝶抱秋花。困眠不覺依蒲褐。
歸路相將踏桂華。更著綸巾披鶴氅。他年應作
畫圖誇。○寒碧軒詩。清風肅肅搖牕扉。牕前修
竹一尺圍。紛紛蒼雪落夏簟。冉冉綠霧沾人衣。
日高山蟬抱葉響。人靜翠羽穿林飛。道人絕粒
對寒碧。爲問鶴骨何緣肥。○垂雲亭僧清順作
子瞻詩云。江山雖有餘。亭榭若難穩。登臨不得
要。萬象各偃蹇。惜哉垂雲軒。此地得何晚。天功
爭向背。詩眼巧增損。路窮朱欄出。山破石壁在。
海門浸坤軸。湖尾抱雲巘。葱葱城郭麗。淡淡烟
村遠。紛紛鳥鵲去。一一渙樵返。雄觀快新獲。微
景收昔遁。道人真古人。嘯味慕嵇阮。空齋臥蒲
褐。芒屨每自捆。天憐詩人窮。乞與供詩本。我詩
久不作。荒澁旋鋤藝。從君覓佳句。咀嚼廢朝飲。
○此君軒詩。臥聽謾謾碎龍鱗。俯看蒼蒼玉立
身。一舸鳴夷江海去。尚餘君子六千人。○車王
峰。明遠堂詩。十年不向此。凭欄景象依然一。望
間龍蜃吐雲天。入水樓臺倒影日。啣山僧子僻

寺難爲隱人在扁舟未是閒孤鶴似尋和靖宅
盤空飛下復飛還○朱繼芳江湖偉觀詩吳山
表裏水爲池百有餘年壯帝居天目遠將雙鳳
落海門近拱六龍飛胥濤白雪生秋思太乙紅
雲駐夕暉江上沙鷗湖上舫柳邊風裏兩依依
○善住閣運使瞿拱捨宅建有山中四時亭安
樂窩○香月隣廖瑩中國後併於似道○挹秀
園楊駙馬別墅○秀野園劉鄜王琦別墅有四
弁堂○趙紫芝墓趙師秀溫州人工詩有集卒
塋於此劉後村吊詩有蓋出香分妓惟畱硯付
兒之句蓋亦宕逸之士也。

其前爲四聖延祥觀竹閣

四聖延祥觀舊在孤山宋高宗爲康王時常使于
金夜見四巨人執仗衛行詢之方士云紫微有
大將四名曰天蓬天猷翊聖真武王心異之及
即位乃建觀祀之即今六一泉地是也元初楊
璉真伽改於武林門外至正間再遷葛嶺

竹閣舊在孤山寺中白樂天所作杭人因以祀公
宋時徙建於北山報恩院故稱竹閣寺黃宜山
詩移自孤山占此山荒涼老屋萬琅玕櫻桃楊

柳空花夢。千古清風蒲閣寒。今其地爲杭妓沈氏園。嘉靖二十四年沈氏坐法當籍。太守陳公一貫欲改祠宇以祀楊公。孟瑛士論以妓室不可棲郡長。陳公患之。時客有說公者曰：何不還以祀白公也。白公守杭時勤民敏政，操履清白，然雅好躋攀，屬意聲妓。去郡數載，猶有沉紅昵綵之思。故其詩云：故妓數人憑問訊，新詩兩首倩流傳。意趣所鍾，生死一致，奉以安神似無不可。况又仍其故地乎。陳公然之，遂扁其堂曰竹閣。門曰玄關。從公詩所謂無勞別修道，只此是

玄關也。近廢爲六橋草堂。少鄉徐江山別業。又西爲虎頭巖，嘉德永壽講寺。

虎頭巖山形突出，若虎頭然。吳越王盛時，望氣者云：杭州有王氣，藝祖命鑿之，今斷落矣。巖下宋有儀王墓，顯明寺。儀王仲湜，宋宗室也。當靖康時，徽欽北駕，六軍欲擁王而立之，王堅拒不從。曰：自有真主。六軍遂約王踰月，真主不出，則王當大位。王陽許之，未幾高宗即位於應天。王躡關詣行在，命爲濮王。後常自贊其容，曰：性比山麋，貌同野叟。皓月清風，良朋益友，湛然靈臺，確

乎不朽薨後葬於此其子孫視諸邱爲盛人以爲積善之報云

嘉德永壽講寺宋理宗時秦國夫人毛氏者皇后母也既老結庵於此就葬焉即庵爲寺有芝產基側因名芝巖前有放生池翔泳堂幻隱洞寶粧閣東有寶嚴院垂雲亭借竹軒西有定業院環峰堂龔夢軒神僊宮靈耀觀金廢白廷王翔冰堂酒中詩環辭度得雪兒歌濃墨斜書碧玉柯醉折芙蓉薰酒盞裏湖涼似外湖多

又西爲鳳林禪寺君子泉

鳳林寺俗呼喜鵲寺唐長慶初禪師圓脩居此四十餘年棲息松上有鵲構巢其傍人遂呼爲鳥窠禪師白樂天守杭州時常往參之曰太師居處甚險禪師曰太守險樂天曰弟子位鎮山河何險之有禪師曰心火相構識浪不停得非險乎樂天服之宣德間僧如月重建勅名鳳林寺圓修骨塔存焉僧來復詩寶網金幢變劫灰瞿曇寺裏盡蒿萊鳥窠無樹山雙泣不見談禪太傳來

君子泉本在定業院中亦鳥窠禪師道場也院廢

而泉湮後人遂勒石于此寒冽而深會為方沼
可冰鮮焉

寺右舊有快活園水竹院落仁壽庵並廢○快活
園趙婉容別墅○水竹院落賈似道離亭在西
泠橋南左挾孤山右帶蘇堤波光萬頃與闌檻
相值騁快絕倫內有奎文閣秋水觀思剡亭

西湖遊覽志第八卷終

西湖遊覽志第九卷

北山勝蹟

錢唐田汝成輯撰

葛嶺之西為履泰山棲霞嶺桃溪棲霞洞紫雲洞牛
鼻墓妙智庵

棲霞嶺上桃花爛燦色如凝霞其北有古劍關蓋
左寶雲右僊姑西山夾峙若劍門然宋立巡司
于此有水一道名桃溪經岳墳前入湖嶺西為
烏石塢

棲霞洞在妙智庵左地多怪石隱翳榛莽中賈似

對道壘而異之命施奮重俊見竒遂乃扶藏剔幽
為亭曰暢曰鑰俗入其中穹然如夏屋雙石相
倚為閤闕風從南來豁呀而出寒骨凄神不可
久竚故暑遊最勝石甃小臺突然坎中衡二石
下達於坻仰視左竇四五通明大者圓徑丈許
有水洞深不可測頃者惡僧以遊人之多塞兌
垢徑僅餘丈尺耳

涼徹骨

紫雲洞在嶺巔去妙智庵數百步許倚空如懸陰
涼徹骨

武穆部將累立戰功轉寧國軍承宣使紹興十
七年上巳日都統制田師中大會諸將臯遇毒
亟歸語所親曰臯年六十一官至侍從即死無
恨所恨者南北通和不以馬革裹屍顧死牖下
耳明日卒或言秦檜使師中毒臯云景定初追
封輔文侯

妙智庵即牛臯香火院嶺北有金鼓洞昔人伐石
其間聞金鼓下作乃止

嶺下有處士仇仁近員外郎張光弼墓並廢○仁
近名遠錢唐人宋咸淳名士宋亡落魄江湖元

初辟溧陽州學正未幾隱去王詩文所著有山村集洪武初祠於府學鄉賢祠錢思復挽詩詩窮八十年江海正凄然玉塵風生頰青山雪滿巔門墻張籍俊墓表孟郊賢出處人皆識哀歌徹九泉張仲舉詩前輩凋零盡南陽有古阡詩應傳四海酒不到黃泉槐國真成夢桃園亦是僊松根一掬淚慘淡墮風煙○張光弼廬陵人仕元爲浙省左司員外郎罷官居花市遨遊湖山累月不返有詩名所著有左司集其詩云但教懷抱能傾倒莫向尊壘計有無不爲訪僧三

竺寺肯乘烟艇過西湖酒館湖船盡有名玉杯時得肆閒情至今人說張員外不是看花不入城

嶺下爲岳武穆王墓翊忠祠分屍檜流芳亭

岳武穆王墓王名飛字鵬舉相州湯陰人少負氣節沉毅寡言有神力未冠挽弓三百觔弩八石宋高宗時以戰伐功歷官都統屢陳恢復大計高宗慮欽宗之返而攘已也陽獎而陰憾之丞相秦檜揣知帝旨遂力主和議會兀朮寇拱毫詔飛往援金人大敗追及朱僊鎮中原響應謂

其部下曰直抵黃龍與諸君痛飲耳方指日渡河而檜欲割淮以北棄之乃召張俊楊沂中先勸言飛孤軍不可久留以金牌十二召之班師飛憤惋泣東向拜曰十年之九壞于一旦矣明年兀朮寇淮西張俊畏敵不敢進詔飛往援兀朮遁俊忌之飛遂力請解兵柄會兀朮遺檜書言飛不死和議終不成檜乃諷臺臣何鑄羅汝楫等交章論飛言金人攻淮西飛至舒蘄而不進與張俊按兵淮上又欲棄山陽而不守張俊又劫王俊誣飛令張憲岳雲通書協謀冀以兵

柄還飛檜遣使捕飛父子下獄令諫議大夫侯尚鞫成之會歲暮獄無佐證檜一日獨居室食柑玩皮若有思者其妻王氏窺咲曰老漢一何無決擒虎易縱虎難也檜犁然當心致片紙獄中即日報飛死矣蓋摺殺之年三十九雲憲皆棄市獄卒隗順負飛屍踰城至九曲叢祠潛瘞之以玉環殉樹雙橘識焉紹興末金人益猖獗太學生程宏訟飛冤詔還飛宗屬徙邊者孝宗時詔復飛官謚武穆改葬於棲霞嶺雲祔其傍廢智果院爲祠賜額曰褒忠衍福寺墓上

西泠志卷之六
四
之木皆南向蓋英靈之感也嘉定四年封鄂王
宋亡寺廢王之六世孫在江州者名士廸與宜
興岳氏通譜合力起之未幾復廢至元間天台
僧可觀者訴于官鄭明德爲作疏語云竊念故
宋贈太師武穆岳鄂王忠孝絕人功名蓋世方
畧如霍嫖姚不逢漢武徒結志於忘家意氣如
祖豫州乃遇晉元空誓言於擊楫賜墓田棲霞
嶺下建祀祠秋水觀西落日鼓鐘長爲聲寃於
草木空山香火猶將薦爽於淵泉豈期破蕩于
孫盡壞久長規制典祊田墮佛宇春秋無所烝

嘗塞墓道毀神榭風雨遂頽廟貌鶴鷗夜啼拱
木蹶躅春開斷垣淚落路人事關世教蓋忠臣
烈士每詔條有致祭之文豈狂子野僧攬國典
出募緣之疏墾明有司告之臺省冀聖天子錫
之珪璋褒忠義在天之靈激死生爲臣之勸周
武封比干墓事著遺經唐宗建白起祠恩覃異
代疏戚杭州經歷李全慨然重興之廟塑王像
以其子雲雷震霖霆祔焉後作燕寢像王父母
及王夫人與王之女號銀瓶娘子者尋燬雲飛
養子也每立奇功飛輒隱之能握鐵椎重八十

斤死年二十三霖子珂嘉定間作額天辯誣錄
天定錄程史金陀粹編飛事愈白廟中有石刻
飛詩詞二首送紫岩張先生北伐詩云號令風
霆迅天聲動北陬長驅渡河洛直擣向燕幽馬
蹀闕氏血旗臬可汗頭歸來報明主恢復舊神
州其詞云怒髮衝冠凭欄處瀟瀟雨歇擡望眼
仰天長嘯壯懷激烈三十功名塵與土八千里
路雲和月莫等閒白了少年頭空悲切靖康耻
猶未雪臣子恨何時滅駕長車踏破賀蘭山缺
壯志飢殮胡虜肉笑談渴飲匈奴血待從頭收

拾舊山河朝天闕

皇明初勅建其祠有司

春秋致祭弘治間叅政周本得其裔孫於衢州
召令世守之太監麥秀重建殿寢雲所用鐵鎗
猶存正德八年都指揮李隆鑄銅爲秦檜王氏
万俟卨三像反接跪露臺十二年太監王堂塑
王父母妻子女諸像扁曰一門忠孝古今吊其
墓者詩已成集畧掇其著者葉紹翁詩萬古知
心只老天英雄堪恨復堪憐如公少緩須臾死
此虜安能八十年漠漠凝塵空偃月堂堂遺像
在凌烟早知埋骨西湖路悔不鷓夷理釣船○

林弓寮詩天意只如此將軍是可傷忠無身報
主冤有骨封王苔雨樓墻暗花風廟路香沉思
百年事揮淚對斜陽○趙子昂詩岳王墳上草
離離秋日荒涼石獸危南渡君臣輕社稷中原
父老望旌旗英雄已死嗟何及天下中分遂不
支莫向西湖歌此曲水光山色不勝悲○高則
誠詩莫向中原嘆叅離英雄生死係安危內庭
忽下班師詔絕漠全收大將旗父子一門甘伏
節山河萬里竟分支孤臣尚有埋身地○帝遊
魂更可悲○潘子素詩海門寒日澹無輝偃月

堂深晝漏遲萬竈貌貅江上老兩宮環珮夢中
歸內園羯鼓催花發小殿珠簾看雪飛不道帳
前胡旋舞有人行酒著青衣○林清源詩誰收
將骨塋西湖已卜他年必沼吳孤冢有人來下
馬六陵無樹可棲鳥廟堂短計慚嫠婦宇宙惟
公是丈夫往事重觀如敗局一龕燈火屬浮屠
○徐孟岳詩童大王歸事已離岳將軍死勢尤
危直教萬歲山頭雀去遶黃龍塞上旗飲馬徒
聞腥鞏洛洗兵無復望條支湖邊一把摧殘骨
盖世功名百世悲○高李廸詩大樹無枝向北

風千年遺恨泣英雄。班師詔已成三殿。射虜書猶說兩宮。每憶尚方誰請劍。空嗟高廟自藏弓。棲霞嶺上今回首。不見諸陵白露中。○陶九成詩精忠祠宇西湖上。再拜荒墳感昔遊。斷碣草深蒙鼻鳳。空山日落叫輟輒。運移宋祚難恢復。帝幸燕雲困虜囚。逆檜陰圖傾大業。昭陵無意問神州。偷安甫遂邦家志。飲痛甘忘父母讎。信使北和憐屈膝。策文南駐忍含羞。兩宮五國瞻征幟。丹詔班師下節樓。萬里長城真自壞。中興武績遂云休。嗚乎竟死姦邪手。顛沛誰爲社稷

憂黯黯冤魂遊。狴狴紛紛雨淚泣。貔貅唯餘滿地萋。弘血不見中流祖。逃舟氛氤已塵金。匱匪冕旒終換鐵。兜鍪姓名竹帛書。千載父子英雄。土一丘。老樹尚知朝禹穴。遺黎總解說王猷。復田起廢憐僧寺。移檄褒嘉賴省侯。聖世即今崇祀典。佇看寵渥到松楸。

翊忠祠以祀劉允升。施全者允升建州布衣士也。聞岳武穆王被逮詣闕上書訟其冤。秦檜大怒。下棘寺論死。全殿前司小校也。憤秦檜主和議。誤國挾刃刺之。不中。被擒磔於市。弘治二年工

部主事莆田林沂建祠祀之四年按察使楊俊副使吳伯通等重拓大之題其祠曰翊忠

分屍檜在墓前天順間杭州同知馬偉鋸而植之首尾異處以示磔屍狀至今猶活前有石壁書盡忠報國四字每字方五尺餘

流芳亭在墓西有石刻王像存焉其贊曰惟武穆王天錫勇智氣吞強胡力扶宋季桓桓師旅元戎是寄行將恢復遭讒所忌生既無怍死亦何愧萬古長存惟忠與義

嶺之後爲掃箒塢黃龍洞護國仁王禪寺

護國仁王禪寺宋淳祐間經畧花園使孟珙建自其趾斗折而上有洞豁訝深杳莫測水泉紺凜旱不縮而潦不盈有龍居焉故老相傳曩夏雨初霽時常有神物蜿蜒臥松上其氣萋萋然而黃蓋黃龍也故世號黃龍洞珙既建仁王寺弁作龍祠延高僧慧開居之屬歲大旱理宗召慧開祈雨退而默坐帝遣內侍問之對曰寂然不動感而後通既而大雨自是無雨輒禱禱輒應遂封黃龍爲靈濟侯賜祠額曰護國龍祠元至正燬洪武初僧祖吉重建其東有黃山橋塢內

有天龍庵永安院西靖宮並廢

又西爲淨性禪寺

淨性寺宋乾德五年吳越王建名淨心院大中祥符間改今額元末燬國初重建傍有青衣

橋

履泰山之西爲僊姑山張憲墓

僊姑山之西東山街口可通古蕩西溪靈隱山脈至此少伏若斷而連其傍有桃花街舊有淨勝院俗稱昇僊宮宋時女僧妙清建高宗常臨觀焉有御愛松院側有乾濕水洞

張憲墓憲岳武穆愛將也累立戰功紹興十年兀術頓兵臨穎憲破其兵追奔十五里中原大震會秦檜主和班師憲還未幾檜與張俊謀殺岳飛誘飛部曲能告飛事者卒無人應張俊乃自爲狀付奸人王俊妄言憲與岳雲通書謀還飛兵權張俊親行鞫煉憲被掠無全膚竟不伏張俊乃手具獄詞告成于檜憲坐死塋于此景定二年追封烈文侯元總管夏思忠爲立石表其墓尋廢皇明正德十二年布衣王天祐發地得碣石乃崇封焉知府梁材爲建廟宇修撰

唐臯爲之記

山麓舊有冲虛觀福壽觀妙明院傳經院淨元觀
葑洲園並廢○冲虛觀宋寧宗時宮人張氏爲
尼建此○福壽院乃旌德寺之子院也有寧宗
御書桂堂二字○葑洲園廖瑩中別墅有花香
竹色太平相在世綵愛君子習說等亭

僊姑山之西爲青芝塢王臯講寺

青芝塢有五色土雜銀星者嘗產青芝從石板巷
入南宋駐蹕繞湖皆市廛也故有巷名其前爲
佛牙塢

王臯寺故名淨空院南齊建元中僧曇超說法於
此龍王來聽爲之撫掌出泉遂建龍王祠晉天
福三年始建淨空院于泉左宋理宗書王臯淨
空院額以榜之祠前有池畝許清澈可鑑蓄五
色魚數十頭游泳如畫其泉溉田千頃近者曰
鮑家田吳越相鮑慶臣采地也皇明宣德
間置白紙局就池造紙洊濁久之局廢而泉復
冽矣旁一小池水翠綠雖以白粉投之亦成綠
色白樂天詩湛湛王臯色悠悠浮雲身閒心對
定水清淨兩無塵手把青筇杖頭戴白綸巾興

盡下山去。知我是何人。○吳廉靜過鮑家田詩。搖旆家家酒。扶犁處處村。草深迷井口。槿密擁籬根。綠水明秧本。青山失燒痕。多應忘蠶事。畏客掩柴門。

塢內舊有慈聖院。普向院。竹所院。天清宮。常清宮。南禪資福尼寺。顯忠寺。顯嚴寺。報德寺。並廢。○慈聖院有呂公池。宋乾道間高僧能會池上縛庵取水呪之。以施病者。輒愈。遂號聖水池。○普向院。宋紹興間殿帥楊存中請以鮑家田爲殿。土司諸軍塋所建院守之。尋加愍忠資福普向之。

額○天清宮。宋時。沈師謙建。○常清宮。宋沂王功德院。○南禪資福院。宋紹興初封開尼惠果從駕。建累朝內宮。施捨殿宇甚盛。○顯忠寺。宋內侍羅舜香火。

其後爲靈峰禪寺。

靈峰寺。故名鷲峰禪院。晉開運間。吳越王建。延伏虎光禪師居之。捨田數千畝。度僧數百。宋治平間。改賜今額。俗傳爲唐時裴休墓院者。非也。寺內有翠微閣。眠雲堂。洗鉢池。幽僻岑寂。遊人罕至。天陰月黑時。聞偃魑悲嘯。林間近有築墳其

傍者穴地丈餘得甕缶畜腐墨物若醯醬類者
蓋兵燹之餘也前朝居民稠密湖山殆無隙地
云

又北為法華山秦亭山方井佛惠禪寺智勝庵東嶽
廟

法華山去靈隱山後可里許去北十里為西溪秦
亭則法華之分脉也俗訛為蜻蜒山

方井在桃源嶺下徑六尺深一仞許井上有亭米
元章書扁久廢正德十年里人王槐重建進士

鄧鑿記

佛惠禪寺晉天福中建○智勝庵 皇明弘治

間建○東嶽廟宋時建

青芝塢西南為慶化山水竹塢神霄雷院

水竹塢宋為步司前軍寨其傍有宋殿撰周杞墓

杞處州人建炎三年知常州值苗劉之亂杞倡

義勤王以功除右文殿修撰卒葬於此其兄格

建炎初為浙西提刑死於陳通之亂贈龍圖閣

學士勅葬於北山兄弟忠義名震一時云

神霄雷院宋咸淳間羽士陳崇真者自闔來卜居

于此善雷法因勅建雷院以居之賜號冲素真

入六月二十四日郡人雲集設醮捨貲至今不
廢

西湖遊覽志第九卷終

西湖遊覽志第十卷

錢唐田 汝成 輯撰

北山勝蹟

僊姑山之西南為駝巘嶺過行春橋入九里松

駝巘嶺一名駝苑嶺有濟王墓濟王竑者寧宗長

子也先是寧宗選教宗子得太祖十世孫昀以

嗣沂王濟王與史彌遠有隙彌遠日媒葉於寧

宗屬意於昀後寧宗崩彌遠比周揚后矯詔立

昀為帝是為理宗濟王出居湖州太湖賊潘壬

潘丙劫濟王謀立之濟王不從率州兵擊賊變

西漢書卷之十
聞彌遠稱詔殺濟主人多寃之尋乃見崇詔復
王官爵景定五年勅葬于此賦次大賦類番王
行春橋宋時爲左軍教場有馬三寶墓不知何代
人葬教場內嘗欲去之有黑蜂數百出墓中不
可近至元十五年六月軍廝名狗兒者掘發之
掘得鐵券一題曰鴈門馬氏墓橫衝橋至元十五
年六狗兒壞我屋其定數如此始知行春橋乃橫
衝橋也又西有小行春橋乃九里松徑其南爲
黃泥嶺可達南山又西爲唐家衝馬家衝
西九里松唐刺史袁仁敬守杭植松以達靈竺凡九

里左右各三行每行相去八九尺蒼翠夾道宋
有一字門吳說書九里松三字高宗欲易已書
以黼黻湖山命筆數十幅嘆曰無以易說所書
也遂以金飾舊額重揭之今亡余闕賦九里松
送吳左丞詩結駟向青郊松陰九里遙言從天
竺寺直渡小春橋偃蹇成芝蓋蕭瑟陰蘭橈相
逢何所贈期君保後凋○少師夏公謹詩百盤
雲磴入千峰飛蓋行穿夾道松長晝風雷驚虎
豹半空鱗甲舞蛟龍江壽夜合秋聲壯湖雨春
添黛色濃欲藉丹青圖直幹恨無韋偃得相從

九里松傍舊有麴院西溪庫三藏塔明真宮資德
廟萬壽院紫芝道院靈曜觀崇壽院昇僊宮香
林園班衣園朱弁墓並廢○麴院宋時取金沙
礪之水造麴以釀官酒其地多荷花世稱麴院
風荷是也○西溪庫沽酒之所○三藏塔在臘
脂嶺下土色甚赤故名○明真宮宋嘉定中建
寧宗書扁○資德廟在唐家衙口有慕容貴妃
墓○萬壽院在瑞岡塢南山白雲宗建○紫芝
道院道士陳崇真建○靈曜觀在駝苑嶺下○
崇壽院張淑妃香火院○班衣園韓世忠別墅

○朱弁墓弁徽州人紹興初授官副王倫使虜
見執附表云節上之旄盡落口中之舌徒存嘆
馬角之未生竟飛雪塞攀龍髯而莫逮淚灑冰
天高宗覽之流涕後歸卒葬於此

折而南爲僊芝嶺晉福講寺葛翁井
僊芝嶺俗稱臘脂嶺下有瑞岡塢鷄子塢香藥礪
綠筠坡自北而南可達小麥嶺

晉福講寺宋咸淳間天台僧朋礪募貴戚鮑氏建
凡八年始成穹殿傑閣諸刹罕倫飯僧至三千
人家之巽爲記元時趙子昂書額國初猶盛今

寥落將滅矣。寺內有芝雲臺。鄧文原寄住持無
公詩。淨土談玄。屢歎。靡平生。我亦悟。毘尼天台
道在毘陵記。廬阜神交。惠遠師。度嶺白雲飛。錫
處散花清。畫說經時。西南峰下龍泓路。會記山
房舊賦詩。淵源。不。自。論。同。無。幾。千。試。香。藥。開
葛翁井亦稚川遺蹟。有無尾螺螄。

寺西舊有圓覺天台。教寺自唐開山為脩證了義
法師塔院。宋南渡後重建。高宗書天申萬壽圓
覺寺額。以賜時有僧守璋能詩。所著有柿園集。
高宗嘗書其晚春一絕云。草深烟景重。林茂夕

陽微。不雨花猶落。無風絮自飛。復親書圓覺經
及製二詩。賜之。詩云。古寺春山青更妍。長松修
竹翠含烟。汲泉擬欲增茶興。暫就僧房借榻眠。
久坐方知春晝長。靜中心地自清凉。人人圓覺
何曾覺。但見塵勞盡日狂。寺有歸雲堂。三昧正
受閣。理宗御書清凉覺地。元至正燬。○宋吳寶
鎮詩。梵室飄香隔竹聞。壁間舊賜爛奎文。山深
翠輦經行處。猶臥從龍說片雲。○元鄧文原詩。
大圓覺境清凉地。要闡毘盧具藏開。飛錫不妨
隨鶴下。蟠桃曾見有龍來。相逢定性三生路。盡

了塵心萬劫灰憶我初年慕禪說石橋烟雨過
天台

又西為黑觀音堂

黑觀音堂在集慶寺之東俗傳弘治間太監張慶
遊山至此見青衣女子衝過匿入此庵索之不
得見座中黑漆觀音禮拜而去自此香火遂盛
此矇瞶之說也不知觀音男子相者也豈真
女子哉白玉蟾觀音像贊云柳絮多頭緒桃花
好面皮夫是之謂誰東海比丘尼又云頂戴彌
陀呈醜拙手持楊柳惹塵埃縱饒入得三摩地
當甚街頭破草鞋夫以觀音為比丘尼亦取其
女像而云然爾

又西為集慶山顯慈集慶講寺

集慶講寺宋理宗淳祐十一年貴妃閻氏建為功
德院閻氏鄞縣人明艷絕倫後宮為之奪寵寺
額皆御書巧麗冠於諸刹經始之辰內司分市
材木於郡縣旁緣為奸壟青採斫鞭笞追逮鷄
犬不寧雖勳臣舊輔之墓皆不得自保或作詩
諷之曰合抱長材臥壑深于今惟恨不空林誰
知廣厦千斤斧斲盡人間孝子心其後恩數漸

隆雖御前五山亦所不逮一日忽於法堂鼓上
得大字一聯云淨慈靈隱三天竺不及閻妃好
面皮於是行下天府緝捕其人終不得有三池
九井月桂亭金波池金廢猶存理宗御容一軸
燕遊圖一軸仇仁近詩半生三宿此招提眼底
交遊更有誰顧愷謾畱金粟影杜陵忍賦王華
詩旋烹紫笋猶含籜自摘青茶未展旗聽徹洞
簫清不寐月明正照古松枝

又西南過合澗橋爲飛來峰龍泓洞青林洞王乳洞
射旭洞靈鷲塔

合澗橋在飛來峰路口北澗自靈隱而下南澗自
天竺而下合流于此號曰錢源唐時有靈隱天
竺寺門袁居中所書白樂天詩一山分作兩山門
兩寺元從一寺分東澗水流西澗水南山雲起
北山雲前臺花發後臺見上界鐘聲下界聞遙
想吾師行道處天香桂子落紛紛○張光弼詩
兩澗何年合一橋終日聞桃花逐流水未覺是
人間

飛來峰界乎靈隱天竺兩山之間蓋支龍之秀演
者高不踰數十丈而怪石森立青蒼玉削若駭

豹蹲獅筆卓劔植衡從偃仰益玩益竒上多異
木不假土壤根生石外矯若龍蛇鬱鬱然丹葩
翠蕤蒙幕聯絡冬夏常青烟雨雪月四景尤佳
其下巖扁窈窕屈曲通明壁間布鑄佛像皆元
浮屠楊璉真伽所爲也晉咸和元年西僧慧理
登而嘆曰此乃中天竺國靈鷲山之小嶺不知
何以飛來僊靈隱窟今復爾否因樹錫結庵名
曰靈隱命其峰曰飛來支分而回拱者曰靈鷲
曰稽留日月桂曰蓮花盤礴照曜爭竒而競秀
乳漉泠泠大旱不絕僧慧洪詩意行忽出門欲

畱聊執杖雲間飛來峰巖然眉睫上氣勢欲翔
舞秀色無千嶂萬物皆我造何從有來往大千
等毫末古今歸俯仰心知目所見皆即自幻妄
如窺鏡中容容豈他人像頗恠胡阿師乃作去
來相此意果是非一笑聲輒放但復臨冷泉舉
手弄清漲○陳剛中詩寒峰插天出玲瓏萬菡
萼微風起松際怪石勢搖撼上有百尺松幽花
綴紅椽野猿忽躍去摘下露千點回首冷泉亭
天鏡光歛歛遊姬長眉青嬌童兩髦髻平生山
水癖如人嗜昌歎對此一壺酒王色翻醉臉路

逢老祝髮絳袍金光閃。茲山信自佳。恨爲緇塵
染。置之且復醉。天竺鼓統統。○林景熙詩何年
移竺國。秀色發稜層。清極不知夏。虛中欲悟僧。
樹幽嵐氣重。泉落乳花凝。猶憶烹茶處。閒來話
葛藤。○尹仲明詩湖山獨愛蜚來峰。孤猿長嘯
寒烟中。丹霞赤壁藏梵宇。布襪草履來僊翁。松
根詰曲絡山骨。水光雲氣相冥濛。流傳來自天
竺國。攘奪造化開鴻蒙。吾意此語特虛幻。豈有
重濁能凌空。山川大地太始奠。何假移掇迷西
東。詩人好奇故踵襲。眩惑千古欺盲聾。是耶非
耶姑勿論。且坐挹此亭間風。

龍泓洞一名通天洞俗傳其底可通浙東有採乳
石者入之聞江濤浪浪然櫓聲聒耳壁間有蔣
之竒篆書賈似道廖瑩中等題名宋咸通中有
高士丁飛者字翰之居洞中讀書採藥力田自
給年七十二矣操繩缶斤斲陟峻如飛嘗月夜
登巖鼓瑟流淙協奏天籟凄冷往往致鸞鶴之
翔集

青林洞一名理公巖广扉深杳寒栗侵肌暑遊最
快

王乳射旭二洞宛轉通明懸泉淅淅乳溜若凝昉
青然有徑可陟山頂壁間題刻甚多苔蘚侵蝕漶
漫不可辯識竒石巖巖若鏤若刻信天巧所爲
非人力也

靈鷲塔一名理公塔在龍泓洞口蓋慧理遺蹟也
過回龍橋爲石門澗冷泉亭

回龍橋在龍泓洞之左

石門澗卽冷泉所經一名靈隱浦楊蟠詩云有靈
誰何所隱深浦老菴葭漁父一舟泊却疑秋漢槎
蓋先時澗浦深廣可以通舟宋紹興間有善堪

輿之術者言靈隱火山也得水可以禳災乃建
石閘以畜澗水 皇明弘治十三年山水橫

發閘崩而澗澁寺亦頽廢云○澗傍舊有連巖
棧伏虎棧皆爲楊髡鑿爲佛像醜怪刺目無復
天威之趣澗中有臥龍石慈雲法師種松其上
今松旣不存而石亦埋沒陵谷變遷亦可慨也
白樂天石門澗詩石門無舊徑披榛訪遺蹟時
逢山水秋清暉如古昔常聞慧遠輩題詩此巖
壁雲覆莓苔封蒼然無處覓蕭疎野生竹崩剝
多年石自從東晉後無復人遊歷獨有秋澗聲

潺湲空旦夕。○陸務觀冷泉放閘詩泉聲飛出
閘委迤綠陰間。此地原無暑。多時不入山。草
欹疑石墜。水定見魚還。誰得同龜鶴。遊吟半日閒。
○周紫芝詩呼猿洞口水濺濺。忽見奔流下九
天。乞得少陵三峽句。爲君題作倒流泉。○萬里
西興浦口潮浪花。真似海門高。誰將一夜山中
雨。換作三江八月濤。

冷泉亭唐刺史元與建。舊在水中。今依澗而立。冷
泉二字乃白樂天所書。亭字乃蘇子瞻續書。今
亦亡矣。今扁盱江左贊隸書。白樂天記略云。東

南山水餘杭爲最。就郡則靈隱寺爲最。就寺則
冷泉亭爲最。亭在山下水中。寺西南隅。高不倍
尋。廣不累丈。撮竒搜勝。物無遁形。春之日。草薰
木欣。可以導和納粹。暢人氣血。夏之日。風冷泉
涼。可以蠲煩析醒。起人幽情。山樹爲蓋。巖石爲
屏。雲從棟生。水與階平。坐而翫之。可濯足於床
下。臥而狎之。可垂釣於枕上。潺湲潔澈。甘粹柔
滑。眼目之囂。心舌之垢。不待盥滌。見輒除去。先
是領郡者相里君。作虛白亭。韓僕射臯。作候僊
亭。裴庶子棠棣。作觀風亭。盧給事元輔。作見山

亭右司郎中元稹最後作此亭五亭相望如指
之列佳境殫矣雖有敏心巧目復何加焉故吾
繼之述而不作○又畱題天竺靈隱兩寺詩在
郡六百日入山十二回宿因月桂落醉爲海榴
開黃紙除書到青宮詔命催僧徒多悵望賓從
亦徘徊寺暗烟埋竹林香雨落梅別橋憐白石
辭洞戀青苔漸出松間路猶飛馬上杯誰教冷
泉水送我下山來○蘇子瞻送唐林夫詩靈隱
寺前天竺后兩澗春淙一靈鷲不知水從何處
來跳波赴壑如奔雷無情有意外莫測肯向冷

泉亭下相縈回我在錢唐百六日山中暫來不
暖席今君欲就靈隱居葛衣草屨隨僧蔬肯與
冷泉作主一百日不用二十四考書中書○曹
旣明詩朱簷日靜軒牕冷碧嶂雲低草樹香山
影倒沉波底月夜闌相對瀉寒光○張輿詩小
朶峰巒擁翠華倚雲樓閣是僧家憑欄盡日無
人語濯足寒泉數落花○林丹山詩一泓清可
浸詩脾冷暖年來只自知流出西湖載歌舞回
頭不似在山時○趙師秀冷泉夜坐詩云衆境
碧沉沉前峰月正臨樓鐘晴聽響池水夜觀深

清靜無人世。虛空見佛心。却尋來處宿。風起古
松林。

靈隱山北高峰靈隱禪寺

靈隱山去城西十二里高九十二丈周一十二里
亦曰靈苑曰僊居曰武林俗稱西山其山起歛
出睦跨富春控餘杭蜿蜒數百里結局于錢唐
如引兩臂南垂臙脂嶺北垂駝峴嶺其山峰之
北起者曰高峰高峰之東曰屏風嶺又東曰駝
峴嶺高峰之西者曰烏峰又西曰石筍又西曰
楊梅石門又西曰西源亦曰西庵支出于西源

之右者曰石人其南起而墜之藹然者曰白猿
左出白猿之前者曰香爐盆前而垂澗者曰興
正右出于白猿之前而雲木森然者曰月桂白
猿之東曰臙脂嶺白猿之西曰獅子峰又西曰
五峰又西曰白雲又西曰中印中印之前曰無
碍又前曰善住金善住而特起者曰稽留俗稱
鷄籠者訛也稽留之西曰蓮花有巖曰玉女蓮
花之東曰飛來上有石梁西跨下有巖洞曰龍
泓曰香林曰射旭曰理公其水南流者謂之南
澗北流者謂之北澗南澗自合澗橋遡流至白

雲峰之下凡八逾橋其七石也其一木也北澗自龍脊橋遡流至西源峰之下凡七逾橋其四石也其三木也南澗之源出自白雲峰而東注會他支澗逾第八橋之西會奚家澗入新移澗出開口曲流北經合澗橋北澗之源出自西源峰而東注過騰雲塢偃楓樹塢湍于第五橋下浸飛來峰趾滙于西塢漾渟于洗耳潭潄于澗渚東嶼亦曰暖泉漱灑于冷泉亭下經呼猿石門澗潛激于龍脊橋東經合澗橋又東二里過行春橋出靈隱浦入西湖謂之錢源泉之南出者七曰月桂曰伏犀曰丹井曰永清曰偃松曰聰明曰倚錫月桂在天竺寺之右伏犀在飛來峰之巔其餘皆出支塢泉之北出者九曰冷泉曰韜光曰白沙曰石笋曰白公茶井曰無著偃松曰永安曰彌陀曰騰雲惟冷泉在澗壩其餘皆出支塢

北高峰石磴數百級曲折三十六灣上有華光廟以奉五顯之神山半有馬明王廟春月祈蠶者咸往焉浮屠七層唐天寶中建會昌中燬錢王修復之宋咸淳七年復燬羣山屏列湖水鏡淨

西海志卷之十
三
雲光倒垂萬象在下。渙舟歌舫若鷗鳥，出沒烟
波遠而益微。僅覩其影，西望羅刹江，若匹練新
濯，遙接海色，茫茫無際。郡城正值江湖之間，委
其蛇曲折，左右映帶，屋宇鱗次，草木雲蒸霧鬱，葱
葱悉歸眉睫。山頂舊有望海閣，今廢。蘇子瞻詩
言遊高峰塔，蓐食治野裝，火雲秋未衰。及此初
旦涼，霧霏巖谷暝，日出草木香。嘉我同來人，久
便雲水鄉。相觀小舉足，前路高且長。古松攀龍
蛇，怪石坐牛羊。漸聞鐘磬音，飛鳥皆下翔。入門
空無有，雲海浩茫茫。惟見龔道人，老病時絕糧。

問年笑不答，但指空藜杖。心知不復來，欲歸更
徬徨。贈別畱延布，今歲天蚤霜。○鄧林詩捫蘿
百折上嶙峋，世界凡僊到此分。小朶岳蓮來異
域，孤撐天柱入層雲。江湖俯看盃中瀉，鐘磬回
從地底聞。借問須彌在何處，老僧畱客且論文。
○姚肇和詩：高峰千仞玉嶙峋，石磴躋攀翠靄
分。一路松聲長帶雨，半空嵐氣總成雲。上方樓
閣參差見，下界笙歌遠近聞。誰似當年蘇內翰，
登臨處處有遺文。

靈隱禪寺晉咸和元年僧慧理建山門，扁曰絕勝。

覺場相傳葛洪所書或云宋之間書寺有石塔
四皆吳越王建宋景德四年改景德靈隱禪寺
元至大元年僧慈照重修覺皇殿至正間燬
國初重建改靈隱寺宣德間僧曇鑑建三門面
壁軒良玠建佛殿殿中有拜石長丈餘有花卉
鱗甲之文工巧如畫正統間琰理建直指堂堂
而故張卽之書也舊有百尺彌勒閣蓮峰堂千
佛殿延賓水閣望海閣巢雲亭見山亭白雲庵
松源庵及宋理宗御書覺王寶殿妙莊嚴域命
廡宋之間詩鷲嶺巖巖巖龍宮鎖寂寥樓觀滄

海日門對浙江潮桂子月中落天香雲外飄門
蘿登塔遠剝木取泉遙霜薄花更發冰輕葉互
凋夙齡尚遐異搜對滌頰翫待入天台路看余
度石橋○張祐詩峰巒開一掌朱檻幾環延佛
地花分界僧房竹引泉五更樓下月十里郭中
烟後塔聳亭後前山橫閣前溪沙涵水靜澗石
點苔鮮好是呼猿久西巖深響連○賈島詩峰
前峰後寺新秋絕頂高牕見沃洲人在定中聞
蟋蟀鶴於棲處掛獼猴山鐘夜渡空江水汀月
寒生古石樓心欲懸帆身未遂謝公此地昔曾

遊○林逋同運使遊靈隱詩山堂氣相合日暮
生秋陰松門韻虛籟錚若鳴瑤琴舉目羣狀動
傾耳百慮沉按部旣優游此時振衣襟泓澄冷
泉色寫我清曠心飄飄白猿聲答我雅正吟經
臺復丹井捫蘿嘗徧臨鶴蓋青霞映玉趾蒼苔
侵溫顏照槁木真性訝幽禽所以仁惠政及物
一何深灑翰嶙峋壁返駕旃檀林回瞻窳堵峰
天半千萬尋○子瞻和李杞畱題靈隱寺方丈
詩君不見錢唐湖錢王壯觀今已無屋堆黃金
斗量珠運盡不勞折簡呼四方宦遊散其祭宮

闕畱

哀樂兩須臾

何用

鬱紆溪山處處皆可廬最愛靈隱飛來孤喬木
百丈蒼髯鬚擾擾下笑柳與蒲高堂會食羅千
夫撞鐘擊鼓喧朝晡疑香方丈眠氍毹絕勝絮
被縫海圖清風時來驚睡餘遂超羲皇傲几籟
歸時棲鴉正畢逋孤烟落日不可摹○王鎮威
詩路入西山窈復深法筵應有聖僧臨兩峰塔
影天垂蓋千佛林光地布金牛笛倘逢圓澤語
龍宮還見閩僊吟空中更上藏雲洞水樂泠泠
奏八音○少師夏公謹和楊邃老詩捫蘿詰曲

歷崔嵬王削芙蓉面面開白日老僧初出定中
春有客到山來林深祇樹雲霞遶地迥諸天日
月迴世上宰官元是佛洞門猿鶴莫驚猜○少
師巖中望自西湖入靈竺詩蘇橋初進艇靈峰
忽振衣三竺開丹鷲諸天在翠微澗水浮花片
松磴鎖烟霏屈折巖扉到蕭條苔徑歸藉草還
畱酌聞香頓息機

山畔舊有隱居堂思真堂夢謝亭紫薇亭翠微亭
壑雷亭瀑雷橋虛白亭觀風亭候僊亭見山亭
靈鷲寺無垢院處士徐夔墓鐵舌庵海峰庵無

着禪師塔煖泉醴泉臥犀泉蕭公泉金廢○
居堂後漢陸瑋建瑋字文該隱居茲山學易圖
淮南王劉安及九師像以祀之又名九師堂○
思真堂晉許邁建○夢謝亭晉杜明禪師爲謝
靈運建靈運會稽人其父舉之憂不宜畜乃寄
養於杜明杜明夜夢東南有賢人相訪翌日靈
運至遂建夢謝亭一名客兒亭盧元輔詩云長
松晉家樹絕頂客兒亭是也○紫薇亭唐紫薇
舍人唐詢建○翠微亭宋韓蘄王世忠建世忠
旣忤秦檜解樞柄奉朝請逍遙湖上因建此亭

○虛白觀風候僊見山四亭見白樂天記中樂
天醉題候僊亭詩蹇步垂朱綬華纓映白鬚何
因駐衰老只且有歡娛酒興還應在詩情可便
無登山與臨水猶未要人扶又云謝安山下空
攜妓柳惲洲邊只賦詩爭及湖亭今日會朝花
詠水贈蛾眉張商英見山亭詩簾捲踈烟醉眼
開浮雲飛盡見崔嵬苦嗟霖雨遮藏久深謝晴
風引致來丹桂有時明月滿舊山無路白猿哀
禪僧指我真空理心火茫然一夜灰○靈鷲寺
在合澗橋邊晉開運二年吳越王建宋嘉熙初

改興聖寺有靈山海閣滴翠軒九品觀堂東坡
祠堂元末燬今爲張氏墓○無垢院在寺後方
丈○徐奭墓奭錢唐人隱居湖山以脩真終老
宋徽宗聞其名賜號冲晦先生○無着禪師塔
爲墓地遂啓其塔有陶龕馬容色如生髮垂至
眉指爪盤屈遶身舍利數百粒三日不壞竟茶
毘之僧肇淮海有詩云一定空中五百年不須
惆悵啓顏甄路邊多少麒麟塚過眼無人贈紙
錢○煖泉一名渦渚臨安志云在東嶼臥犀泉

醴泉俱在煖泉側蕭公泉在寺西

山半爲石笋峰茯苓泉韜光庵

石笋峰一名卓筆峰高數十丈圓峭特立峰舊有
普圓院一名普嚴天福二年黃氏重修改名普
圓內有超然臺金沙白沙二泉杭守祖無擇愛
茲山之勝建庵于此左右金漆板扉皆趙閱道
蘇子瞻秦少游黃魯直諸賢畱題文與可畫竹
數枝後黃夫人以超然臺爲塋地徙院稍西勝
蹟泯矣

茯苓泉在靈隱寺後山古松波娑泉極甘冽

韜光庵韜光禪師建師蜀人當唐代宗時辭師出

遊師囑之曰遇天可前途爾即止師遊靈隱山

巢溝塢值白樂天守郡悟以此吾師之命我也

遂卓錫焉樂天聞之遂與爲友題其堂曰法安

嘗以詩招之入城云白屋炊香飯葷膾不入家

瀘泉澄葛粉洗手摘藤花青芥除黃葉紅薑帶

紫菜命師相伴食齋罷一甌茶韜光不赴報之

詩云山僧野性好林泉每向巖阿倚石眠不解

栽松陪玉勒惟能引水種金蓮白雲乍可來青

嶂明月難教下碧天城市不能飛錫去恐妨鶯

轉翠樓前內有金蓮池烹茗井壁間有趙閱道
蘇子瞻題名

靈隱寺之西爲嚴將軍墓

嚴將軍者名德太平當塗人從高皇帝征伐

有功累授中翼元帥府統軍元帥會張士誠據
兩浙命德統兵征之連戰皆捷遂令守禦杭州
洪武元年天台賊反德往討之中流矢卒上悼
之贈驃騎上將軍追封天水郡公勅有司治葬
于此

又西爲粟山石人嶺王女巖

粟山高六十二丈石人嶺一名馮公嶺形如人狀
雙髻聳然下有洞府名王女巖一名新婦石西
北有珍珠塢東墓嶺飛泉二道吳大帝石杵存
馬上刻黃武二年歲在戊午八月三日凡十二
字

過嶺爲西溪

西溪居民數百家聚爲村市俗稱畱下相傳宋高
宗初至杭時以其地豐厚欲都之後得鳳凰山
乃云西溪且畱下後人遂以爲名楊蟠詩爲慶
西溪好長憂溪水窮山源春更落散入野田中

○董嗣杲詩渙樵耕牧自成村就屋編籬古意
存出塢野雲多曲折過橋溪水半清渾一逢白
壁書香社幾見朱闌障墓門地利最饒人事簡
西山家還有別乾坤

嶺下舊有時思薦福寺晉咸和中建于下天竺基
宋紹興間遷于此爲徽宗吳太后塋所高宗書
額太后手書金剛經置塔中有宜對亭通雲亭
天池樓雙珠亭萬玉軒湖山至此幽邃極矣元
至正末燬國初重建復燬墓前有二石馬琢
栗刻如生舊傳夜輒馳驟鞦韆光瑩如玉至今苔

蘚不侵也葉紹翁宜對亭詩講罷間來立矮闌
袈裟衣薄翠光寒請師莫起雲屏想只作當年
面壁看○張伯雨天池樓詩天池一樓小如架
擎出半天天雨華山圍文室獅子座寺屬三朝
母后家時呼白猿聽竒句亦許飛僊餐紫霞我
來把斷闔風口只畱林角置袈裟

飛來峰之西爲呼猿洞

呼猿洞在冷泉亭左晉慧理嘗畜白猿於此六朝
宋時有僧智一訪舊蹟畜猿於山臨澗長嘯則
諸猿畢集謂之猿父好事者遂施食以齋之因

建飯猿臺梅詢詩古澗飛白猿寂歷不知處風
激石上泉僧疑月中樹微茫認松雲髣髴橫樵
路空碧增爾思蒼蒼柰烟霧○高德暘詩冷泉
亭外松千樹時有老猿歸樹間逐侶出雲風動
壑呼兒歸洞月橫山曉空蕙帳人初去秋入荷
衣客未還清響不聞巴峽怨時聽嫋嫋和潺湲
○吳大有詩月照前峰猿嘯嶺夜寒花落草堂
春聞聲蜀客腸徧斷曾是孤舟渡峽人○李草
閣詩靈隱寺外冷泉亭蘿風吹日晝冥冥猿啼
一聲松子落無數白雲生翠屏

洞對舊有上下永福寺天聖寺今廢○永福寺在
形勝山下一名資嚴山宋隆國黃夫人功德院
宏規巧構丹雘相輝瓦用碧色琉璃咸淳九年
建至元時分爲上下兩院內有金沙池銀沙池
福泉亭兩花亭石笋厓

西海表寶志卷之十一

西海表寶志卷之十一

西海表寶志卷之十一

西海表寶志卷之十一

西海表寶志卷之十一

西海表寶志卷之十一

西海表寶志卷之十一

西海表寶志卷之十一

西海表寶志卷之十一

西海表寶志卷之十一

西海表寶志卷之十一

西海表寶志卷之十一

西海表寶志卷之十一

西海表寶志卷之十一

西海表寶志卷之十一

西海表寶志卷之十一

西海表寶志卷之十一

西海表寶志卷之十一

西海表寶志卷之十一

西海表寶志卷之十一

西海表寶志卷之十一

西海表寶志卷之十一

西海表寶志卷之十一

程